

TAHUN 2/NOMBOR 17 JAMADIL AWAL, 1407/JANUARI 1987



KELUARAN  
ANGKATAN  
NAHDHATUL  
ISLAM  
BERSATU  
(BINA)

# الهدى

# AL-HUDA

NOMBOR

# 17

SIRI PENGAJIAN DAN MEDIA SILATURRAHIM

Masjid lama Sibul



# AL-HUDA

TAHUN 2/NOMBOR 17 JAMADIL AWAL 1407/JANUARI 1987

## PENGURUSAN

Penasihat:  
USTAZ HAJI FATHI HAJI DUET  
Pegarah:  
TUAN HAJI MOKHSEN IBRAHIM  
Timbalan Pegarah/Ketua Unit Penerbitan:  
HASAN HAJI HAMZAH  
Pegedaran:  
USMAN HJ. AFANDI  
Rekabentuk:  
BUJANG JENAI  
  
Perekaletak  
S.M. DOLLAH

## ANGGOTA PENGARANG

Ketua Pengarang:  
USTAZ HAJI MORTADZA HAJI DAUD  
Penolong Ketua Pengarang:  
USTAZ HAJI HASSANOEDDIN ABU  
BAKAR  
Sidang Pengarang:  
— USTAZ HAJI BAHARUDDIN MANSUR  
— USTAZ SYED MUHAMAD ALWI  
AL-ATTAS  
— DR. WAN ALI TUANKU MADHI  
— USTAZAH ROHANI BINTI AWI  
— USTAZ HAJI ALI FATHULLAH HARUN

## KANDUNGAN

Islam sebagai Agama Panduan hidup boleh menyelamatkan manusia .....	3
Pengamalan tasauf dalam kehidupan moden .....	12
Perkembangan Dakwah Islam di Sabah dan Sarawak terancam? .....	18
“Kristianisasi” Ummat Islam	
Tercampar .....	22
Kekuatan da’ia .....	26
Ruang Muslimah - Benarkah wanita lemah aqal dan Agamanya? .....	33
Ruang Kesihatan - “Tidur” salah satu tanda kebesaran Allah .....	36
Laporan Klinik BINA .....	44
Mimbar Hadis .....	48
Sejarah Nabi Ibrahim, alaihissalaam .....	50
Kisah iman dan cabarannya dalam Al-Quran .....	54
Antara Tuan Mufti dan Penguasa .....	57
Sudut Profail - Seorang intelek dan aktibis .....	59
Tazkirah - Amal .....	62
Kursus BINA Cawangan Limbang .....	64

## PENGUMUMAN

Tuan-Tuan dan Puan-Puan,  
Muslimin dan Muslimat sekalian;

Dimaklumkan dengan segala hormatnya bahawa pihak pengurusan penerbitan Risalah AL-HUDA mengalu-alukan sumbangan derma seikhlas hati bagi membiayai penerbitan seterusnya risalah ini.

Tiap-tiap derma akan dikeluarkan resit rasmi yang boleh dikecualikan daripada cukai pendapatan.

Segala sumbangan boleh dialamatkan seperti berikut:-

Kepada:  
Pegarah,  
Penerbitan Al-Huda,  
Ibu Pejabat BINA,  
Jalan Tun Datuk Patinggi  
Haji Abdul Rahman Ya’kub,  
Petra Jaya,  
93050 Kuching, Sarawak.

Sekian dimaklumkan, terima kasih.  
Pegarah

قُلْ إِنَّ هُدَى اللَّهِ هُوَ الْهُدَى  
(البقرة: ١٢٠)

Katakanlah: "Sesungguhnya pertunjuk Allah itulah  
pertunjuk yang sebenarnya." (Al-Baqarah 120)

---

---

**TERHAD  
UNTUK PARA AHLI SAHAJA**

---

---

Ibu Pejabat,  
Jalan Datuk Patinggi  
Haji Abdul Rahman Yakub,  
Petra Jaya, 93050 Kuching,  
Sarawak, Malaysia.

Telifon: 082-443993,  
082-443994 ext. 11 atau 31

# ISLAM SEBAGAI AGAMA PANDUAN HIDUP BOLEH MENYELAMATKAN MANUSIA

---

Oleh: HASAB

---



*Islam mengarahkan ummatnya supaya tolong-menolong dan bantu-membantu dalam usaha-usaha kebaikan dan kebaktian.*

## **1. ISLAM DAPAT MEMPER- SATUKAN MANUSIA SELURUH DUNIA** Pandangan Islam terhadap manusia

Islam memandang kejadian manusia ini seluruhnya adalah sama:

- a) Semua manusia itu dijadikan oleh Allah Yang Satu (Allah Yang Maha Esa). Tidak ada satu manusia pun yang dapat menjadikan manusia, apalagi unsur-unsur yang halus, seperti apa yang disebut orang dengan sel-sel, benda yang tidak mempunyai akal itu. Bahkan sel-sel itu sendiripun adanya, ialah kerana dijadikan oleh Allah. Tidak mungkin sesuatu terjadi dengan sendirinya.

Semua makhluk dijadikan oleh Allah dan termasuk dalam satu kekeluargaan Allah, sebagaimana yang telah diterangkan oleh

Rasulullah SAW dalam salah satu hadisnya. "Al-Khalqu kulluhum iyalullah."

- b) Semua manusia itu berasal dari diri yang satu, atau jenis yang satu, sebagaimana telah diterangkan oleh Allah, Yang Maha Menjadikan, dalam Al-Quran, antara lain dalam Surah An-Nisa' ayat 1, Surah Al-Aa'raaf ayat 189 dan Al-Ana'am, ayat 98.

Semua dalil atau hujjah yang tersebut diatas telah dibuktikan dengan hasil penyelidikan para ahli sains yang mempunyai akal yang sehat, kerana ianya memang benar demikian adanya. Ciptaan Allah memang benar, dan tidak terdapat didalamnya sebarang cacat dan salahnya, sebagaimana telah dinyatakanNYA dalam Al-Quran, Surah Al-Fathir ayat 43.

Maka sekiranya seluruh manusia mau mengakui kebenaran dan kenyataan yang demikian, maka tentulah seluruh manusia diatas dunia ini akan dapat merasakan persatuan diantara sesamanya, dalam satu keluarga, iaitu KELUARGA ALLAH.

Inilah prinsip utama sebagai dasar peri kemanusiaan menurut konsep Islam, iaitu rasa persamaan didalam satu keluarga Allah ('iyalullah).

Dengan demikian tidak perlu timbul:

- seorang manusia menghina manusia lainnya;
- satu bangsa memandang rendah terhadap bangsa lainnya;
- satu bahasa lebih mulia dari

bahasa lainnya;

- dan sebagainya, dan sebagainya.

Jika terjadi adanya perbezaan bangsa, warna kulit dan bahasa itu adalah kerana perbezaan tempat, iklim dan pengaruh-pengaruh alam sekitarnya, yang mana semua kejadian itu tidak lari daripada konsep aturan yang telah diciptakan oleh Allah, iaitu apa yang disebut "sunnatallah". Dalam Surah Ar-Rum ayat 22, Allah telah menyatakannya: "Dan sebahagian dari tanda-tanda kebesarannya (Allah), ialah kejadian langit dan bumi dan perlainan bahasa dan warna kulitmu. Sesungguhnya dalam hal yang demikian patut menjadi pemandangan bagi orang-orang yang berakal (berpengetahuan)."

Dan Allah telah menegaskan dengan firmanNYA dalam Surah Al-Hujurat ayat 13, yang bermaksud: "Dan kami jadikan kamu bersuku-suku dan berbangsa-bangsa, ialah supaya kamu kenal mengenal satu sama lain."

Nabi Besar Muhammad SAW telah menegaskan lagi dalam salah satu hadisnya, bahawa tidak ada kelebihan bangsa Arab daripada bangsa asing (bukan Arab), begitupun tidak ada kelebihan orang kulit putih daripada orang kulit hitam, kecuali kerana disebabkan taqwanya kepada Allah.

Taqwa artinya hati-hati dalam menjaga diri, jangan sampai berbuat kesalahan, yaitu melanggar sebarang ketentuan hukum yang

telah ditetapkan Allah, dan sebaliknya selalu ingat dan siap sedia untuk mengikuti segala peraturan hidup daripada Allah dan RasulNYA. Sementara Allah sendiri akan menilai, siapa diantara manusia-manusia itu yang paling taqwa kepadaNYA. Itulah manusia yang mendapat kemuliaan disisi-NYA, sebagaimana telah diterangkanNYA pada ujung ayat 13 Surah Al-Hujurat tersebut diatas.

Sekarang ternyata belum semua manusia diatas dunia ini mengakui kebenaran prinsip persamaan dalam keluarga Allah tersebut. Tentu lah ada bermacam-macam sebab. Sebab yang utama ialah kerana diantara mereka ada yang sama sekali tidak percaya kepada Allah (atheis). Mereka tidak percaya, bahwa manusia itu dijadikan oleh Allah. Mereka sangka, bahwa manusia, bahkan seluruh alam ini terjadi sendirinya. Jika ada sesuatu kelebihan pada mereka, apakah kekayaan atau kekuasaan, mereka menjadi bongkak, sombong, seolah-olah semua kejayaan mereka itu adalah hasil otak dan usaha mereka sahaja. Sikap yang demikian itu ditunjukkan juga oleh manusia-manusia yang musyrik, iaitu mereka yang tidak sepenuhnya percaya kepada Allah dengan segala hukum dan peraturanNYA, akan tetapi mencampur adukkannya dengan hawa nafsunya sendiri. Mereka membuat peraturan dan undang-undang yang menyimpang daripada ketentuan-ketentuan Allah dan Rasul. Inilah pangkal kekacauan, penindasan, penipuan

dan berbagai macam jenayah diatas dunia ini.

## 2. KEWAJIPAN UMMAT ISLAM

Bagaimana mengatasinya? Tidak lain, ajaran Islam mengenai prinsip persamaan manusia dalam keluarga Allah Yang Maha Esa mesti disebarluaskan kepada seluruh manusia. Masing-masing mestilah dapat merasakannya dan mengamalkannya. Kalau belum sampai di mengerti dan difahami oleh mereka yang belum Islam? Maka orang-orang yang sudah mengaku Islam dan beriman kepada Allah Yang Maha Esa wajiblah. mengamalkannya lebih dahulu diantara sesamanya. Mereka hendaklah dapat memberikan contoh tentang ajaran persamaan itu. Bahkan didalam Islam lebih ditegaskan lagi, bahwa semua orang-orang yang beriman itu adalah bersaudara, sebagaimana firman Allah dalam Surah Al-Hujurat ayat 10. Agama Islam melarang ummatnya saling menimbulkan perbuatan dosa dan permusuhan, sebaliknya menyuruh bekerjasama dalam usaha-usaha kebajikan dan bertaqwa. (Lihat Surah Al-Maidah ayat 2).

Kalau ajaran Islam ini dijalankan dan dikuat-kuasakan dalam bentuk undang-undang hukum oleh negara-negara seluruh dunia, maka tidak perlu ada orang yang mati kebuluran disuatu negeri, sementara dinegeri lainnya orang bermewah-mewah dengan makanan serta kekayaan yang

bertumpuk-tumpuk. Mereka tidak akan sampai hati membiarkan saudara-saudaranya mati kelaparan, saudaranya sesama manusia, saudaranya dalam satu keluarga Allah.

Apalagi dalam lingkungan sesama ummat Islam sendiri. Walaupun mereka berlainan bangsa dan berlainan negara, mereka diwajibkan berada dalam hubungan ukhuwah Islamiah (persaudaraan Islam) antara satu sama lain. Tidakkah patut timbul peperangan antara sesama mereka. Tidakkah patut timbul permusuhan atau konfrontasi antara mereka, jika mereka memang sebenarnya ummat Islam, bangsa Islam atautkah warganegara Islam.

Sekarang kita lihat, masih saja ada diantara sesama "bangsa Islam", atau "negara Islam" yang saling berperang satu terhadap yang lain. Pun masih ternyata negara-negara Islam itu belum dapat bersatu dalam menghadapi musuh bersama. Dimana letak kesalahannya? Tiada lain, melainkan oleh kerana mereka masih saja memper-syarikatkan Allah dengan tuhan yang lain, iaitu hawa nafus mereka sendiri. Belum sejujur batang tubuh serta dengan jiwanya mau tunduk kepada Allah, kepada kebenaran aturan dan hukum Allah. Mereka lebih mementingkan harta dan kekayaan daripada perdamaian dan ketenteraman. Kerana sejengkal tanah mereka mau berbunuh-bunuhan. Pada hal, dengan tegas Allah memerintahkan supaya menciptakan perdamaian

antara sesama bersaudara. (Al-Hujurat: 10). Tidakkah boleh dicapai perdamaian dengan jalan berunding secara baik-baik, dengan hati yang saling terbuka, dengan akal yang sehat menuruti pertunjuk daripada Allah yang sama-sama kita sembah? Nafsu itu bukanlah tandingan Allah! Nafsu itu adalah juga makhluk, benda yang boleh diatur, dilentur dan dikendalikan oleh kita sendiri. Tidakkah boleh ia menjadi raja kepada kita, apalagi akan menjadi Tuhan kepada kita, sama pula dengan kedudukan Allah Ta'ala!!!

### **3. SAMA-SAMA TUNDUK KEPADA HUKUM ALLAH**

Kalaulah semua ummat manusia mengakui, bahwa mereka dijadikan oleh Allah Yang Satu, dan hidup dalam satu keluarga Allah, maka mustahaklah mereka sama-sama tunduk kepada peraturan yang telah ditetapkan oleh Allah itu.

Sebenarnya seluruh benda-benda alam, baik yang dilangit (ruang angkasa), baik yang dibumi, ataupun yang ada dalam tubuh manusia sendiri, semuanya berjalan dengan patuh menurut aturan yang telah ditetapkan oleh Allah Ta'ala.

Perhatikanlah matahari, bulan dan bintang-bintang diangkasa, semua berjalan dan beredar didalam garis edaran (orbit) masing-masing; tidak lah terjadi pergeseran, apalagi pertumbukan diantara benda-benda angkasa itu. Demikian pula pergantian malam dengan siang setiap harinya, tetap

teratur menurut jangka waktu yang telah ditetapkan oleh Allah. Air yang mengalir disungai-sungai tiada henti-hentinya hinggalah ia sampai menuju muara dilaut lepas. Sinar matahari memanaskan air, lalu air menguap membubung keangkasa, bertumpuk-tumpuk menjadikan awan, awan berpusing, bermega-mega, mega yang berat lalu jatuh berbutir-butir menjadi hujan, air hujan menyirami tanah-tanah yang kering atau mengalir lagi, menjadikan sungai-sungai.

Kita perhatikan pula darah yang mengalir didalam batang tubuh kita sendiri, mengalir berpusing daripada jantung keseluruh batang tubuh lalu kembali lagi ke jantung, tiada henti-hentinya, sampailah saatnya nyawa bercerai dengan tubuh.

Kesemuanya itu berjalan dengan teratur menurut aturan hukum yang telah ditetapkan oleh Yang Maha Penciptanya, ialah Allah Subhanahu wa Ta'ala. Kalau benda-benda alam, termasuk unsur-unsur jasmani daripada manusia sendiri, semuanya patuh mengikut aturan yang telah ditetapkan oleh Allah, mengapa unsur-unsur rohani (terutama nafsunya) tidak mau tunduk kepada peraturan daripadanya? Pada hal ia semestinya tahu, bahwa unsur rohaniah, terutama nyawanya sendiri, berada dalam genggaman Allah. Kalau nyawa itu dicabut oleh Allah, ia tidak dapat berdaya lagi. Kalaupun Allah membuat peraturan

supaya manusia mengendalikan hawa nafsunya dan hidup mengikuti hukum-hukum yang telah ditetapkan oleh Allah, maka itu semua adalah untuk kepentingan keselamatan dan kebahagiaan hidup mereka jua.

#### **4. JIMAT CERMAT DALAM SETIAP URUSAN**

Sebagaimana manusia sendiri tidak mau jatuh celaka, Allah telah dahulu memperingatkan dengan firmanNYA dalam Surah Al-Baqarah ayat 195, yang bermaksud: "Dan belanjakanlah (harta bendamu) menurut jalan yang telah ditentukan oleh Allah, dan janganlah kamu menjatuhkan dirimu sendiri kedalam kebinasaan. Dan baikkanlah (segala urusanmu), kerana sesungguhnya Allah menyukai orang-orang yang membaikkan (segala urusannya)."

Alangkah tepat dan jituanya peringatan Allah tersebut. Dia suruh kita berhati-hati, dengan perhitungan yang matang, serta tekun menghadapi setiap urusan. Tidak boleh gopoh, atau tergesa-gesa melaksanakan sesuatu pekerjaan. "Fikir dahulu pendapatan, sesal kemudian tak berguna," demikian petua dari orang tua-tua kita, yang sangat sesuai dengan ajaran Islam sendiri. Bekerja hendaklah pakai rencana. Pandai-pandai memilih serta mendahulukan perkara-perkara yang penting dan mustahak. Jangan sampai membuang-buang wang dan tenaga dengan tak bernilai, sebab semua akan mengakibatkan kerugian,

bahkan kebinasaan kepada kita. Gunakanlah wang dan tenaga untuk sebesar-besarnya faedah yang boleh dini'mati oleh kita, sanak saudara kita, baik yang dekat maupun yang jauh, bahkan dapat dini'mati oleh orang banyak didalam masyarakat kita. Kerana setiap amal saleh yang kita lakukan diatas dunia ini adalah menjadi abuan kita nanti dihari akhirat.

Demikianlah ajaran Islam, yang boleh menjamin keselamatan, keamanan dan kesentosaan didalam hidup seseorang manusia dan didalam hidupnya bermasyarakat dan bernegara.

#### **5. KEPASTIAN HUKUM**

Sebagaimana telah disinggung diatas, Allah Ta'ala menjadikan segala sesuatu didalam dunia ini, dan telahpun menentukan hukum-hukum bagi alam itu. Setiap gerak dan setiap perubahan yang terjadi adalah tertakluk kepada hukum-hukum itu, iaitu hukum "sunnatullah". Tak ada yang luput dari pengetahuan Allah. Tak ada yang kuasa menentang kekuasaan Allah; tak ada yang boleh lari dari ketentuan hukum-hukum Allah itu.

Setiap benda, tanpa ada tenaga yang menahan, pasti jatuh dari atas ke bawah. Demikian pula yang dimasukkan kedalam api, pasti hangus dan yang dicelupkan kedalam air, pasti basah.

Alat-alat organik yang ada didalam tubuh kita, seperti otak, darah, perut dan sebagainya, manakala diganggu dengan memasukkan

racun, arak (alkohol), dadah dan sebagainya kedalamnya, pastilah alat-alat dalam tubuh kita itu akan rusak atau buruk. Akibatnya badan kita menjadi sakit, rusak dan binasa.

Itulah sebabnya Allah mengharamkan meminum minuman keras seperti beer, dan yang seumpamanya, dadah, ganja dan yang seumpamanya. Bahayanya sudah terang, sudah sama-sama kita persaksikan.

Berjudi, bertengung atau menerkanerka nasib, adalah pekerjaan yang sia-sia; membuat orang malas bekerja, menghabiskan waktu dan wang. Tidak jarang kejadian, orang-orang kaki judi itu menghabiskan segala harta bendanya dan harta benda anak isterinya, akhirnya jatuh melarat dan sengsara.

Itulah sebabnya Allah mengharamkan perbuatan judi, tengung atau adu nasib tersebut. Akibat-akibat daripada melanggar hukum-hukum yang haram itu, sudah kelihatan bukti-bukti nyata semasa hidup diatas dunia ini. Semua bermuara kepada kebinasaan, kesengsaraan dan penderitaan.

Sekiranya seseorang yang melanggar aturan-aturan itu, mau bertaubat dan menghentikan perbuatan-perbuatannya yang salah itu dan berjanji dengan sebenar-benarnya tidak akan mengerjakannya lagi, maka Allah pun bersedia mengampuninya dan

memberinya pertunjuk kejalan yang benar.

Akan tetapi, kalau dia degil sangat, dan tak mau berhenti mengikutkan hawa nafsunya yang salah itu, maka nanti diakhirat ia akan mendapat hukuman yang lebih pedih lagi, ialah dimasukkan kedalam api neraka.

Mencuri, berzina, membunuh orang tanpa hak, dan sebagainya, didalam Islam ada padahnya yang setimpal. Hakim mahkamah akan membicarakannya menurut aturan hukum acara yang telah ditetapkan, dan terhadap yang bersalah dijatuhkan hukum yang sangat berat, sehingga menjerakan dan menakutkan bagi yang lain-lain. Misalnya: potong tangan bagi yang mencuri, dera (sebat) seratus kali bagi yang berzina dan hukum mati bagi yang membunuh orang.

Semua hukum terhadap jenayah-jenayah tersebut hendaklah dikuat kuasakan oleh setiap negara yang menamakan dirinya negara Islam.

Daripada catitan data statistik Bangsa-Bangsa Bersatu (UNO) kelihatan dengan nyata perbandingan angka-angka jumlah penjenayah-penjenayah di negara negara bukan Islam dengan di negara Islam.

Negara-negara bukan Islam: Setiap satu miliun penduduk terdapat yang melakukan jenayah:

- Canada: ..... 75,000 orang;
- Finlandia: ..... 63,000 orang;
- Jerman Barat: 43,000 orang;
- Perancis: ..... 32,000 orang;

## **Negara Islam yang menjalankan hukum Islam:**

- Saudi Arabia: ..... 22 orang  
(Diambil dari Majallah "Al-Balagh"  
Kuwait No. 492, J'Awal 1399 (1  
April 1979)

Maka terang dan nyatalah, bahawa dari segi hukum jenayah, Islam telah dan akan senantiasa sanggup menyelamatkan ummat manusia, sekiranya hukum Islam itu dapat dikuat-kuasakan ditiap-tiap negara.

## **6. TANGGUNGJAWAB**

Setiap petugas, apakah yang berpangkat tinggi, seperti Kepala Negara, Menteri, Panglima, Hakim dan sebagainya, maupun yang berpangkat rendah seperti Penghulu dan Kepala Kampung, ataupun yang tak berpangkat, semua memikul tanggungjawab atas amanat pimpinan yang disandangnya. Begitulah Rasulullah SAW menegaskan dalam salah satu hadis beliau, yang bermaksud: "Setiap kamu adalah penggembala (pemimpin), dan setiap kamu akan diminta pertanggungjawaban atas gembalaan (pimpinan) kamu."

"Seorang suami bertanggungjawab atas keselamatan rumah tangganya, seorang isteri bertanggungjawab mengenai hal ehwal didalam rumah tangga, seorang pembantu (gajian) bertanggungjawab atas keamanan harta benda induk semangnya," demikian lanjutan dari maksud hadis tersebut.

Manakala tanggungjawab ini tidaklah habis semasa hidup diatas dunia ini sahaja, ianya akan dibawa

kekampung akhirat, dimana tiap-tiap diri akan dihadapkan kemuka mahkamah Rabul Jalil untuk diadili seadil-adilnya.

Mana-mana saja orang yang teraniaya diatas dunia, kerana tidak mendapat perlakuan yang adil oleh tangan-tangan manusia, janganlah merasa bimbang. Manusia-manusia yang tidak adil diatas dunia ini, pasti nanti akan dijatuhi hukuman yang amat berat oleh Hakim Pengadilan dihari akhirat.

Inilah satu keyakinan berdasarkan ajaran "aqidah" Islam. Dan hal ini tak dapat diragukan oleh orang-orang yang benar-benar beriman kepada Allah. Iman kepada Allah tidak dapat dilepaskan dari iman kepada hari akhirat, kerana yang memberitahu tentang kepastian adanya hari akhirat itu adalah Allah Yang Maha Mengetahui akan segala yang lahir, maupun yang ghaib.

Kepercayaan kepada hari pembalasan di akhirat itu dapat selalu memberi peringatan kepada manusia, agar jangan sampai berani membuat kesalahan-kesalahan yang melanggar hukum. Akibatnya besar, bukan saja hukuman dunia, tetapi juga hukuman di akhirat.

Dengan kepercayaan yang demikian, manusia tidak akan mudah berbuat sebarang dosa yang merugikan orang lain, dan juga dapat merugikan diri sendiri.

Inilah ajaran Islam yang boleh menyelamatkan manusia diatas

dunia ini.

Ada lagi satu alat control peribadi yang sangat berkesan (effektif), untuk mengawal diri, jangan sampai berbuat sebarang dosa, walaupun yang sekecil-kecilnya. Iaitu keyakinan yang sesungguhnya, bahwa Allah itu senantiasa melihat, mendengar dan memperhatikan semua gerak-geri, laku perbuatan, perkataan, bisikan, bahkan sengajaan daripada setiap manusia. Semuanya tindak tanduk seseorang manusia itu disuruh buat rekodnya oleh Allah kepada Malaikat Kiraman Katibin. Nanti dihari akhirat masing-masing akan datang ke Pengadilan Allah dengan file rekod masing-masing. Tidak ada kemungkinan bagi seseorang untuk membuat tipu helah lagi mengelakkan tuduhan-tuduhan terhadap dirinya.

Inilah ajaran Islam yang tak ada tolak-bandingannya. Manakala ianya betul-betul dihayati dan diamalkan oleh setiap manusia, maka tidaklah ia berani membuat sebarang kesalahan yang merugikan itu.

Ajaran ini dapat membasmiikan segala penyakit batin yang ada didalam diri manusia; kepercayaan ini dapat pula sebagai "antitoxin" terhadap penyakit hati (a-faa-til qulubb), seperti hasad dengki, marah, putus asa dan sebagainya, dan sebagainya.

Masih banyak lagi ajaran-ajaran Islam yang boleh membawa manusia kepada ketenangan,

kelapangan dan kebahagiaan hidup, seperti melaksanakan ibadah-ibadah; sembahyang, puasa, membayarkan berbagai macam sedekah, seperti zakat, kurban, memperbaiki hubungan silaturahmi dengan keluarga, jiran tetangga dan masyarakat 'amnya dan melakukan hubungan persaudaraan sedunia dengan ibadah haji, dan lain-lain sebagainya.

“Dan tidaklah engkau diutus (kedunia dengan membawa agama

Islam) melainkan adalah untuk mendatangkan rahmat kepada seluruh alam,” demikian wahyu Il-lahi kepada Nabi Besar Muhammad SAW. (Al-Quran, Surah Al-Anbiya' ayat 107).

Mudah-mudahan tak ada manusia yang meragukan lagi akan kebenaran ajaran Islam, kecuali mereka yang memang sudah benar-benar tertutup mata-hatinya.



وَمَا كَانَ لِمُؤْمِنٍ وَلَا مُؤْمِنَةٍ إِذَا قَضَى اللَّهُ وَرَسُولُهُ  
أَمْرًا أَنْ يَكُونَ لَهُمُ الْخِيَرَةُ مِنْ أَمْرِهِمْ  
وَمَنْ يَعْصِ اللَّهَ وَرَسُولَهُ فَقَدْ ضَلَّ ضَلَالًا مُّبِينًا

(الاحزاب: ٣٦)

Yang bermaksud:

“DAN TIDAKLAH PATUT BAGI ORANG-ORANG YANG BERIMAN LELAKI MAUPUN PEREMPUAN, APABILA ALLAH DAN RASULNYA TELAH MENETAPKAN SESUATU KETETAPAN, AKAN ADA BAGI MEREKA PILIHAN (YANG LAIN) TENTANG URUSAN MEREKA. DAN BARANGSIAPA MENDURHAKAI ALLAH DAN RASULNYA, MAKA SESUNGGUHNYA IA TELAH SESAT, SESAT YANG NYATA.”

(Surah Al-Ahzaab, ayat 36).

Fikirkanlah dan renungkanlah, kalau mau  
HIDUP SELAMATI!!!

# PENGAMALAN TASAUFIYAH DALAM KEHIDUPAN MODERN

---

(Dikutip dari Panji Masyarakat  
No 510, Zulqaidah. 1406/Julai  
1986,  
Tulisan Abuddin Nata)

---

KEHIDUPAN masyarakat moden saat ini selalu ditandai oleh adanya gelombang hidup kebendaan dan tekanan hawa nafsu yang amat dahsyat. Tak ada lagi satu bahagian kecil pun yang tak disentuh oleh pengaruh hidup kebendaan tersebut.

Dari satu segi diakui bahwa hidup kebendaan telah memberikan keuntungan yang tak sedikit bagi manusia. Berbagai fasiliti untuk keperluan hidup dibidang pengangkutan, perhubungan, makanan, pakaian, bangunan tempat diam, dalam bidang kesenian dan hiburan dan sebagainya, semuanya sudah tersedia dimana-mana.

Namun dari segi lain, munculnya berbagai kemudahan hidup kebendaan itu telah melahirkan bentuk-bentuk hubungan diantara manusia yang kurang sehat. Satu sama lain hidup bernafsi-nafsi, mementingkan hidup sendiri.



*Umpamanya persatuan gotong-royong berubah menjadi jatuh-menjatuh satu antara yang lain.*

Bahkan tidak jarang terjadi persaingan hidup yang menimbulkan hasad-dengki dan permusuhan. Semangat tolong menolong dan bergotong-royong telah berubah menjadi saling jatuh menjatuhkan. Sementara praktik korupsi atau rasuah dan manipulasi atau penyalahgunaan kekuasaan dan berbagai bentuk penipuan muncul secara bersamaan. Demikian pula keruntuhan akhlak yang

menjatuhkan martabat dan marwah telah mewarnai kehidupan moden itu.

Kehidupan yang berdasarkan kebendaan dan dorongan hawa nafsu semata-mata ternyata tidak cukup buat menenteramkan kehidupan seseorang. Mereka telah dicengkam oleh rasa kebingungan, cemas dan ketakutan serta kegelisahan. Penderitaan hidup yang demikian adalah, disebabkan mereka melupakan nilai-nilai ruhaniah, yang justru merupakan keperluan hidup yang sangat penting.

Kini orang mulai sedar bahwa hidup kebendaan semata-mata tidaklah cukup menjamin ketenteraman dirinya. Mereka perlu nilai-nilai ruhaniah yang lebih tinggi. Emanuel Kant pernah berkata: "Aku terpaksa berhenti sementara melanjutkan penyelidikan dibidang ilmu pengetahuan, agar dapat menyediakan tempat dalam batinku untuk percaya (IMAN)". Demikian pula Dr. Husain Haikal Pasya, seorang intelektual Islam di Mesir yang pada usia mudanya berkecimpung dalam suasana berpikir kebendaan, ternyata pada hari tuanya, ia merasa bahwa hidup kebendaannya itu perlu diimbangi oleh keruhanian. Untuk ini ia pergi ke Mekkah menunaikan ibadah haji.

Semuanya itu menggambarkan bahwa pada hakikatnya naluri hidup keruhanian perlu mendapat tempat dan pemupukan yang subur dalam diri setiap individu.

Dengan mengamalkan hidup kerohanian oleh setiap diri itu, tidak bererti segala kemajuan dibidang kebendaan perlu dimusnahkan. Kita tidak perlu kembali hidup didalam gua-gua batu seperti nenek moyang kita dahulu kala. Melainkan yang kita perlukan ialah KEMAM-

PUAN mengendalikan hidup kebendaan itu dibawah kesucian ruhaniah. "Kalau hal ini dapat dilakukan, maka senjata nuklir dan lainnya yang ada ditangan kita tidak akan membahayakan, melainkan akan memberi manfaat sebesar-besarnya," kata HAMKA.

## **KEHIDUPAN RUHANIAH DAN TASAUF**

Jika kita membaca buku-buku atau literatur lainnya yang berhubungan dengan tasauf, seringkali kita jumpai adanya ajaran tasauf yang sudah agak menyimpang dari semangat ajaran Islam pada umumnya dan pola kehidupan ruhaniah pada khususnya.

Mereka yang menganut tasauf dalam arti mysticism selalunya digambarkan sebagai orang-orang yang hanya menghabiskan seluruh usianya untuk 'ibadah' kepada Tuhan. Mereka hidup mengasingkan diri dari pergaulan masyarakat luas dan dari percaturan dunia, bahkan mengharamkan usaha mencari harta kekayaan dunia. Mereka merasakan dirinya tak terpisah dari Allah, bahkan bersatu dengan-Nya dan berani mati dicincang sekalipun, seperti yang dilakukan oleh tokoh Sufi yang bernama AL-HALLAJ.

Pemahaman tasauf seperti itu tampak mempengaruhi jalan fikiran sebahagian umat Islam tradisional pada umumnya dan kalangan mereka yang sedang putus asa atau frust. Kehidupan mereka menjadi mundur dan terbelakang dalam segala bidang. Sejarah pun telah mencatat bahwa akibat dari pemahaman tasauf yang demikian, menyebabkan umat Islam pada satu masa dahulu tidak dapat menahan serbuan bangsa Mongol. Bagdad dan Cordova, yang merupakan

lambang kejayaan Islam, dapat dihan- curkan oleh pihak lawan yang benci terhadap Islam. Masih banyak lagi con- toh kemunduran yang diakibatkan oleh ajaran tasawuf yang demikian itu.

Ajaran Tasawuf yang seperti itu bukanlah murni sebagaimana yang dikehendaki oleh Agama Islam, kata Prof. Dr. Hamka. Ajaran tasawuf yang seperti itu sudah banyak bercampur dengan pendapat-pendapat sendiri daripada para pengajurnya, dimana ada diantaranya yang diizinkan oleh agama dan ada pula yang tidak ada asalnya sama sekali daripada Al-Quran dan Sun- nah. Kadang-kadang terdapat didalam- nya cara-cara yang diamalkan oleh agama-agama lain ataupun menurut kebudayaan bangsa diluar Arab.

Kerana pengaruh dari ajaran agama lain itu, masing-masing Sufi telah mengembangkan tata-cara beribadah sendiri-sendiri, yang terkadang berbeza dengan bentuk-bentuk ibadah yang telah diajarkan oleh Nabi Muhammad SAW. Tata-cara ibadah tersebut kemudian digunakan oleh sekelompok orang yang menjadi pengikut Sufi itu, yang kemu- dian mengambil bentuk TARIKAT (thari- qat). Seorang yang telah menjalankan satu thariqat hendaklah selalu meng- hadirkan gurunya pada saat ia menger- jakan ibadah tertentu itu, melalui cara apa yang dipanggil dengan istilah 'tawassul'. Disini hubungan seseorang dengan Tuhannya hendaklah melalui perantaraan gurunya itu. Peralihan tasawuf yang bersifat personal kepada tariqat sebagai satu lembaga, juga tidak terlepas dari perkembangan dan perlunya tasawuf itu sendiri.

Jumlah lembaga tariqat itu cukup

banyak, seperti tariqat Naqsyabandiah, Qadariah, Syaziliah, Rafi'iyah, Sanusiyah dan sebagainya.

Ajaran tasawuf maupun thariqat seperti itu, jelas sudah banyak berten- tangan dengan semangat Agama Islam dan pola kehidupan ruhaniah yang dikehendaki.

Agama Islam, seperti kita sedia maklum, adalah sebuah Agama yang menyeru pemeluknya mencari rezeki yang halal dan keredhaan Allah dan mengambil sebab-sebab untuk mencapai kemuliaan, ketinggian dan keagungan dalam percaturan dan perjuangan hidup bermasyarakat bangsa dan antara bangsa.

Agama Islam menyuruh agar pemeluknya menjadi yang dipertuan didunia ini (Khalifah fil-ardh) dengan dasar keadilan, menciptakan kebaikan dimanapun ia berada dan membuka kesempatan seluas-luasnya untuk men- dapatkan kesenangan yang diizinkan oleh Agama ini.

Tasawuf yang murni sebagaimana awal pertumbuhannya, tidaklah berten- tangan dengan semangat Agama Islam seperti tersebut diatas. Iaitu satu ajaran yang bertujuan hendak memperbaiki budi pekerti yang tercela (muzmumah) men- jadi budi pekerti yang terpuji (mahmudah). Dengan pengertian seperti ini, maka semua orang boleh menjadi sufi, dengan tidak perlu memakai pakaian dan tanda-tanda tertentu, atau berkhawat (mengurung diri) sekian hari lamanya didalam bilik, atau mengadu keningnya dengan kening guru ketika bertawajjuh.

Dizaman Nabi Muhammad SAW semua orang telah menjadi Sufi, iaitu Sufi dalam pengertian yang murni itu. Baik

Nabi maupun para sahabatnya yang jumlahnya ribuan, SEMUANYA BERAKHLAK TINGGI, berbudi luhur, sanggup menderita haus dan lapar. Diantara mereka banyak juga yang kaya, tetapi kekayaannya itu tidak sampai memperdayakan dirinya atau menjadikan mereka lupa kepada Tuhannya. Mereka hidup akrab dengan lingkungannya, bahu membahu membangun dunia. Mereka mampu mengubah perjalanan jarum sejarah kehidupan dunia. Mereka adalah orang-orang pilihan yang bermutu tinggi, yang mampu menampilkan dirinya sebagai umat yang paling tinggi didunia (khairul ummah). Al-Quran telah menyatakan: "Wa antumul aa'launa in kuntum mu'minin", dalam surah Ali Imran ayat 139, yang bermaksud: "Dan kamu semuanya adalah orang-orang yang bermutu tinggi, jika kamu menjadi orang-orang yang beriman sejati."

Kehidupan tasauf seperti yang dipraktikkan oleh Nabi SAW dan sahabat-sahabatnya itu benar-benar telah membawa manusia kearah hidup yang seimbang antara dunia dan akhirat. Didikan Islam terhadap keakhiratan dan keduniaan benar-benar telah ditanamkan kedalam dirinya menurut takaran yang seimbang. KEHIDUPAN TASAUF YANG SEPERTI INILAH YANG SESUAI BUAT KEHIDUPAN MODEN SAAT INI.

### INDUK AKHLAK

Inti ajaran tasauf yang dikehendaki oleh Agama Islam adalah memperbaiki akhlak manusia dalam arti yang seluas-luasnya, agar ia mampu mengendalikan dirinya dalam kehidupan didunia ini. Dan nampaknya, antara Agama Islam dengan akhlak mempunyai hubungan yang sangat erat. Hal ini dapat dilihat dalam seluruh

ajaran Islam yang selalu bertujuan membina akhlak, mulai dari sembahyang, puasa, zakat, haji dan sebagainya.

Jika kita membaca buku-buku tentang akhlak, selalu kita jumpai bermacam-macam akhlak yang buruk dan akhlak yang baik. Namun menurut Imam Al-Ghazali, semua akhlak yang baik dan yang buruk itu berinduk kepada: mampu dan tidaknya manusia itu mengendalikan akal, nafsu dan syahwatnya dibawah pertunjuk Agama.

1. AKAL. Jika manusia mampu mengendalikan akalnya dibawah pertimbangan Agama dan kemanusiaan, maka ia akan memiliki sikap bijaksana, yakni sikap yang mampu membezakan antara yang baik dan yang buruk, yang benar dan yang salah. Dan daripada sikap yang bijaksana ini lahirlah akhlak lainnya seperti baiknya pentadbiran, baiknya hati, cerdasnya pikiran, dan lain-lain sebagainya. Hal ini sejalan dengan firman Allah, Surah Al-Baqarah, ayat 269:

يُؤْتِي الْحِكْمَةَ مَنْ يَشَاءُ  
وَمَنْ يُؤْتِي الْحِكْمَةَ فَقَدْ أُوتِيَ خَيْرًا كَثِيرًا  
وَمَا يَذْكُرُونَ إِلَّا أُولَئِكَ الْأَلْبَابُ

(البقرة : ٢٦٩)

Yang bermaksud: "Allah memberi hikmah kepada sesiapa yang dikehendakiNYA. Dan barangsiapa yang diberi hikmah, sungguh telah diberi kebajikan yang banyak. Dan tak ada yang dapat mengambil pelajaran kecuali orang yang berakal."

Jika akal digunakan secara berlebihan dan tidak mengikuti petunjuk Agama (Islam), maka yang akan timbul adalah keculasan (pintar busuk) dan kekeliruan. Sebaliknya, jika akal itu terlalu lemah atau tidak digunakan, maka yang timbul ialah kebodohan, kedunguan atau pandir. Dan dari keadaan itu timbullah berbagai akhlak tercela lainnya.

2. **AMMARAH.** Ammarah ialah nafsu yang cenderung mendorong manusia kepada perkara yang buruk. -Jika manusia dapat mengekang amarahnya, dan melepaskannya berdasarkan tuntutan akal dan Agama, maka akan lahir akhlak yang baik-baik, seperti sanggup menanggung penderitaan, berani mengatakan yang benar, sekalipun terhadap raja, bersikap lemah lembut, tapi teguh pada pendirian, dan lain-lain sebagainya. Sebaliknya, jika ammarah berlebihan, keluarinya tanpa bimbingan akal dan Agama, maka akan melahirkan sikap 'berani membabi buta' atau 'hantam keromo' sahaja. Daripada sikap yang demikian akan timbul beberapa akhlak buruk lainnya, seperti: sombong, angkuh, cepat marah, membanggakan diri dan lain-lain.

Demikian pula, jika ammarah itu terlalu lemah atau kurang daya gerakannya, maka akan melahirkan sikap 'jubun' atau pengecut dan sifat 'khauran' atau tidak ada ghairah.

3. **NAFSU SYAHWAT.** Jika manusia dapat mengendalikan syahwatnya

dibawah pertimbangan akal dan Agama, maka akan melahirkan akhlak yang baik-baik, seperti 'if-fah' atau mampu menjaga kesucian diri, menjaga mertabat (marwah). Dari akhlak ini akan lahir berbagai akhlak baik lainnya, seperti: rasa malu, sabar, pema'af, qana'ah (merasa tenteram dengan apa-apa yang telah dirizqikan oleh Allah untuknya), halus perasaan, dan sebagainya.

Sebaliknya, jika nafsu syahwat bergerak tanpa kendali akal dan Agama, maka akan lahir akhlak-akhlak yang buruk, seperti sikap boros, suka mengambil muka, tak punya rasa malu dan lain-lain sebagainya.

Jika nafsu syahwat lemah, atau sama sekali dihilangkan, akan menyebabkan manusia kehilangan ghairah hidup, tidak ada semangat untuk maju, yang menyebabkan kehidupan didunia akan punah.

Dalam kehidupan dunia modern yang semakin meningkat, dimana kita umat Islam dikendaki supaya selalu dapat memegang teraju pimpinan, maka ajaran tasauf atau thariqat yang sengaja melemahkan ghairah dan semangat perjuangan hidup untuk mencapai kebahagiaan dunia dan akhirat, perlu kita tinjau semula, bahkan perlu kiranya kita ketepikan. Lebih-lebih ajaran tasauf model Al-Hallaj yang membawa umat kepada kesesatan itu perlu sekali dilarang. Marilah kita amalkan tasauf yang diamal dan

dikembangkan oleh Nabi Muhammad SAW dan para sahabatnya. Inilah tasauf yang murni dan sesuai dengan semangat ajaran Islam, yang mendorong manusia maju dalam segala bidang kehidupan, tanpa kehilangan inti dirinya sebagai manusia yang utuh dan seimbang.

Inti ajaran tasauf yang murni itu


ialah pembinaan akhlak yang mulia (akhlaqul kariemah), budi pekerti yang luhur, yang dapat diciptakan dan dibina melalui kemampuan menempatkan gerak akal di bawah bimbingan Agama Islam, dan gerak nafsu ammarah dan syahwat dibawah bimbingan akal dan Agama itu.

(HASAB)

## ● AKHLAK MULIA IBARAT BUNGA

Nukilan: Ustaz Ashaari Muhammad

Akhlak yang mulia ibarat bunga  
Fitnah manusia tertarik padanya  
senang dan tenang melihatnya yang  
merah, hijau, biru, putih, tidak kira  
bunga raya, bunga cina, angerik sama saja  
sebab itu bunga mendapat tempat  
di dalam masyarakat manusia antarabangsa  
dia ditanam di taman-taman  
teristimewa di bandar-bandar dan pekan  
dibariskan di sekeliling rumah  
digantung atau diletakkan  
di para-para yang tersusun indah  
menjadi pengantin di tengah majlis  
begitulah akhlak yang mulia  
walau mahmudah yang mana  
telah disebutkan di dalam syariat  
syukur, redha, sabar, tawadhuk, pemaaf, pemurah  
disenangi Allah, anbia dan aulia  
disukai oleh soleh dan tholeh  
diminati oleh Mukmin dan kafir  
lelaki dan perempuan  
tua dan dewasa  
muda dan kanak-kanak  
tanamlah bunga rohani di dalam diri  
jangan semata-mata menanam bunga yang maddi.



## **Bahaya Kristianisasi?**

# PERKEMBANGAN DAKWAH ISLAM DI SABAH DAN SARAWAK TERANCAM?

OLEH: HASAB

Akhir-akhir ini kita baca didalam akhbar-akhbar tempatan tentang aktiviti atau kegiatan pihak kristian dalam mengembangkan agamanya yang sengaja diimport dari luar batas kerajaan, konon kabarnya dari Kalimantan Tengah.

Dalam majallah Dakwah, bilangan 116 tahun X Safar 1407/November 1986, Drs. Dhiya Cahaya Putra telah membentangkan secara terperinci tentang kegiatan pihak kristian di wilayah Kalimantan, khasnya Kalimantan Tengah. Tidak kurang dari 13 buah Lembaga Kristian Antara Bangsa yang beroperasi, mengadakan pembinaan dan penyebaran missinya di Kalimantan, seperti:

1. The Asia Foundation California
2. Catholic Relief Services, New York
3. Christian National Evangelis Commission, California
4. Church World Service, New York
5. Conservation Baptist Foreign Mission Society, Illinois
6. Mariyknoll Fathers, New York
7. Medical Mission Sisters Philadelphia
8. Mennonite Central Committee, Fensylvania
9. Mission Aviation Fellowship, California
10. The Mustard Seed Inc., Wisconsin
11. New Tribe Mission Inc., Wisconsin
12. World Vision Relief Organisation, Inc. California
13. World Wide Evangelisation Crusade, Pennsylvania

Kalau kita perhatikan nama-nama daripada lembaga-lembaga agama Kristian yang beroperasi di Kalimantan tersebut, ternyata semuanya adalah berasal dari negara Amerika. Mereka dengan mudah dapat masuk kesana,

dengan alasan kerana hendak membangunkan wilayah tersebut, sebagai salah satu cara pemberian bantuannya kepada kerajaan Indonesia. Dan, memang-seperti kita sedia maklum - Amerika adalah Negara super-power yang banyak memberi bantuan kepada negara-negara membangun dirantau Asean ini. Hal ini juga dengan satu tujuan tertentu, ya'ni, supaya rantau ini jangan sampai jatuh kebawah pengaruh lawannya dari pihak komunis.

Dalam pada itu kita sedia maklum, kerajaan Amerika berada di bawah pengaruh dan kuasa kuam Yahudi dan Nasrani. Kaum Yahudi dan Nasrani sangat-sangat memusuhi Islam. Sedang rantau Asean ini sebahagian besar penduduknya adalah beragama Islam. Lebih-lebih dalam wilayah kerajaan Indonesia, Malaysia dan Brunei Darussalam.

Tujuan bangsa Yahudi dan Nasrani itu ialah untuk menguasai dunia dan menghancurkan agama Islam. Mereka tidak senang hati, sebelum semua umat Islam itu memeluk agama mereka. Demikian diungkapkan rahsianya oleh Allah Swt sendiri dalam Al-Quranulkarim, Surah Al-Baqarah, ayat 120.

Untuk menjajah semula rantau ini dengan cara kekerasan, tak layak lagi mereka lakukan. Kerana itu mereka rupanya mau menanamkan pengaruh dan kuasa mereka dengan secara halus, iaitu melalui agama. Mereka berusaha mengkristenkan penduduk-penduduk rantau ini yang masih belum memeluk sesuatu agama, seperti yang terdapat di wilayah Kalimantan atau Borneo ini. Pembangunan-pembangunan yang mereka lakukan di wilayah itu adalah hanya sebagai jambatan untuk mencapai tujuannya. Lagi pula mengadakan

pembangunan-pembangunan adalah sesuai dengan rancana pihak penguasa yang ingin melihat daerahnya cepat beroleh kemajuan. Dalam hal ini terlihat dengan jelas kerjasama mereka yang erat dengan pihak yang berkuasa. Sebab itu mereka dengan mudah mendapat beberapa kesempatan dan kemudahan bergerak. Tidak heran, kalau mereka dapat merebut posisi atau kedudukan yang penting-penting dalam kerajaan.

Dalam tempo yang singkat mereka telah dapat mengkristenkan seramai 139.649 penduduk tempatan. Sedang jumlah umat Islam adalah seramai 264.825 orang. Dalam perbandingan jumlah yang demikian, mereka telah dapat menduduki kursi-kursi dalam kerajaan sebanyak 75%. Jadi umat Islam yang lebih banyak jumlahnya berserta umat lain-lain agama hanya menduduki 25% sahaja?

“Jika keadilan dan kebenaran yang menjadi asas dan ukuran, bukan kesempatan dan kekuasaan, semestinya kedudukan penting dalam kerajaan wilayah Kalimantan Tengah tidak demikian halnya. Paling tidak 25 peratus dijabat oleh Kristian dan 50 peratus oleh Islam; selebihnya oleh penganut agama lain.” Demikian ulasan Penulis dalam majallah Dakwah terbitan Yayasan Dakwah Islamiah Malaysia tersebut diatas.

Jika akhir-akhir ini kita baca didalam akhbar-akhbar nasional Malaysia tentang issue pendatang haram dari negara jiran (Indonesia) yang mencoba menyebarkan agama Kristen kedalam kalangan orang-orang Islam dinegeri ini, maka tentulah mereka itu terdiri dari mereka-mereka yang telah mendapat asuhan dan didikan dari pihak lembaga-lembaga Kristian itu sendiri. Maka

jelashlah strategi dan taktik yang dimainkan oleh mereka dalam mencapai tujuannya, dengan melemahkan dan mendangkalkan kefahaman umat Islam terhadap agamanya, untuk kemudian merangkulnya kedalam agama Kristian.

Kita telah baca pula nasihat-nasihat dan peringatan daripada Datuk Mufti Negeri Sarawak dalam Sarawak Tribune tanggal 5 November 1986 dan juga daripada Mufti Negeri Sabah tanggal 7 November 1986, yang menasihatkan supaya umat Islam dan para pemimpinnya, termasuk yang duduk dalam kerajaan, berhati-hati terhadap usaha-usaha diayah dari pihak kristian itu dan supaya menolak propaganda-propaganda melalui pamflet-pamflet dan buku-buku yang bercorak kesihatan, yang disodorkan oleh pihak-pihak mereka sewaktu berkunjung kerumah-rumah penduduk-penduduk Islam dinegeri ini.

Akan tetapi, menurut pendapat kami, cara penolakan seperti demikian sahaja belum cukup. Kita hendaklah memperkuatkan dakwah kita sendiri terhadap umat Islam, lebih-lebih yang tinggal jauh dikawasan pedalaman. Mereka ini jarang sekali mendapat penerangan tentang agama Islam yang sebenarnya. Besar kemungkinan sebahagian umat kita yang miskin dapat termakan rayuan-rayuan dari pihak pendiyah kristian itu, lebih-lebih lagi kalaulah mereka ditawarkan bantuan material yang sangat diperlukan oleh mereka, seperti obat-obatan, makanan dan pakaian.

Demikian pula umat Islam yang diam dibandar-bandar, lebih-lebih para belia-belianya, perlu sekali diberi penerangan dan pelajaran Agama Islam

yang sebenarnya, sehinggalah akhlak dan tingkah laku serta amalannya sehari-hari memperlihatkan wajah keislaman yang sebenarnya pula.

Sekarang dapat kita saksikan di beberapa bandar dalam negara kita ini belia-belia dan beliawanis Islam hampir sama saja tingkah laku dan akhlaknya dengan mereka yang tidak beragama Islam. Bahkan dikalangan para pelajar Islam terdapat beberapa kemunduran dalam pencapaian pelajaran disekolah, dibandingkan dengan mereka yang bukan Islam. Hal ini tidak dapat kita salahkan kepada orang lain, melainkan kita sen-

diri mesti memeriksa diri kita sendiri, masyarakat rumahtangga ummat Islam sendiri, yang tidak mau tahu dan melalaikan ajaran agamanya.

Oleh sebab itu kami sarankan, agar pihak Majlis Islam bekerjasama dengan semua badan-badan dakwah Islamiah yang ada dinegeri ini, untuk lebih mempergiatkan lagi usaha-usaha dakwah mengikut cara-cara yang lebih berkesan.

Semoga ummat Islam dinegeri ini terselamat dari bahaya Kristianisasi!

(HASAB)

وَلَنْ تَرْضَىٰ عَنْكَ الْيَهُودَ وَلَا النَّصَارَىٰ حَتَّىٰ تَتَّبِعَ مَلِكَهُمْ قُلْ إِنْ  
هُدَىٰ اللَّهُ هُوَ الْهُدَىٰ وَلَئِن أُتْبِعَتْ أَهْوَاؤُهُمْ بَعْدَ الَّذِي جَاءَكَ  
مِنَ الطَّمِّ مَالِكٌ مِنَ اللَّهِ مِنْ وَلِيِّ وَلَا نَصِيرٍ (البقرة : ١٢٠)

Yang bermaksud:

“ORANG-ORANG YAHUDI DAN KRISTIAN TIDAK AKAN SENANG KEPADA KAMU, HINGGA KAMU MENGIKUTI AGAMA MEREKA. KATAKANLAH: SESUNGGUHNYA PERTUNJUK ALLAH ITULAH PERTUNJUK YANG SEBENARNYA. DAN SESUNGGUHNYA JIKA KAMU MENGIKUTI KEMAUAN MEREKA, SETELAH PENGETAHUAN (ISLAM) DATANG KEPADAMU, MAKA ALLAH TIDAK LAGI MENJADI PELINDUNG DAN PENOLONG BAGIMU.”

(Surah Al-Baqarah, ayat 120).

Sebab itu, BERHATI-HATILAH dan BERWASPADALAH, WAHAI KAUM MUSLIMIN DAN MUSLIMAT SEKALIAN!!

# 'KRISTIANISASI'

---

## UMMAT ISLAM

## TERCAMAR

"Ummat Islam" menjadi mangsa fihak "MISSIONARI". Mengapa "VATIKAN" tidak memulakan missinya kepada "negeri" nya sendiri? .....

Perkara yang paling berbahaya, yang sedang dialami oleh fihak ummat Islam sekarang ini, ialah suatu "kedengkian" yang penuh racun, yang senantiasa berniat busuk bagi menjerat Aqidah Islam pada jiwa para generasi mudanya, untuk melepaskan mereka dari Agama yang hanief dengan berbagai-macam cara serta menggunakan apa-apa sahaja yang ada pada mereka untuk matlamat "syetan" ini ..... itulah dia "gerakan Kristianisasi", yang tidak mempunyai padang atau lapangan perjuangan sendiri bagi menanamkan benih-benihnya, kecuali didalam masyarakat Islam, dengan menggunakan kesempatan dalam situasi yang buruk yang sedang melanda sebahagian ummat ini, kemudian dijatuhkannya dengan cara-cara yang keji menjadikan mangsa situasi dan kegoncangan .....

Fihak "VATIKAN" dengan bertungkus-lumus membawa panti-pangji

missi yang buruk ini, dengan berusaha sedaya-upaya yang dilakukan manusia bagi berkhidmat kepada "syetan" yang sesat itu .....

Itulah plan yang keji yang nampak dari celah-celah segala praktikal yang mereka amalkan, tidak berjalan diatas kebaikan manusia dan kebahagiaan, sebagaimana yang mereka perkirakan.

Sebelum kita mengenali apa yang diinginkan oleh fihak Vatikan dari sebalik missi ini, eloklah kita berhenti sejenak bagi menyatakan bahawa fihak Vatikan mempunyai kebolehan yang besar dengan biaya yang tinggi, hampir mencapai jumlah perkiraan Anggaran Belanjawan Amerika Syarikat. Ini berkat kerjasama sebahagian besarnya dengan fihak-fihak bank dan industri-industri besar yang memiliki income yang banyak bagi melakukan pengkhidmatan matlamat-matlamat ini.

Semua sudahlah sedia maklum,

bahwa BABA VATIKAN (PAUL) dilahirkan di POLANDIA ..... dan kita telah lama tertunggu-tunggu, bilakah fihak Baba Vatikan ini pada misi pertamanya melakukan "da'wah" Katholik ditengah-tengah masyarakat Polandia ini .... yang mereka mengingkari wujudnya Allah serta majoriti rakyatnya tiada bertuhan itu. Dan menurut perkiraan, ibadah orang Polandia ialah kepada Setiausaha Jawatan Kuasa Parti Komunis Polandia, dan kemudian meningkat kepada Pemimpin Komunis Leonard Breznev (sekarang Kozdafez) yang sahamnya dimasa sekarang ini melebihi diatas saham-saham Vatikan sendiri. Mengapa misalnya - atas dasar Polandia tanah kelahiran Paul (Baba Vatikan), fihak Vatikan tidak mengarahkan misionarinya kepada Polandia?

Kemudian bilamana Baba Vatikan nampak kemustahilan ini dalam operasinya, maka kita mengharapkan sikap agama-agama antarabangsa yang luas ditempat kursi Baba - secara cepat atau lambat - mengambil tindakan kearah ini.

Itali hampir jatuh dibawah kekuasaan Parti Komunis, dan Baba mengetahui perkara ini. Mengapa misionari Kristian tidak diarahkan kedalam negeri Italia sendiri? Salah satu Institusi Amerika telah mengadakan suatu penyelidikan yang khas, dan menyatakan bahawa jumlah kaum Katholik di Itali tidak lebih daripada 37% sahaja.

Kemudian Perancis, benteng Katholik yang besar, hampir terjatuh pula dalam cengkeraman Komunis dan kaum Ilhad (atheist), bahlan Franseu Mittran sendiri - pengasas strategik negeri, menyatakan kekhawatirannya terhadap situasi yang buruk itu keatas fihak

Katholik, dan dia berusaha bagi kejayaan partinya.

Portugis, Spain, Irlandia, Belgium dan Holland ..... semua negara ini pasti akan jatuh secara cepat atau lambat. Dan kita tidak ingin mengulang-ulang lagi apa yang dinyatakan orang Komunis bahawa Katholik itu tidaklah sesuai bagi apapun. Tetapi yang kita kehendaki atau inginkan daripada fihak Vatikan yang senantiasa menyatakan "perang dengan orang Islam", adalah lebih baik mereka menyadari bahawa semua ini hanyalah akan merobohkan sendi-sendi agama mereka. Bahkan eloklah mereka menengok kembali kearah Jerman Barat, Denmark, Sweden dan Norway, iaitu negara-negara yang sedang bergiat memperjual-belian majalah sex yang kotor dan keji, dan sebagai kemuncak kekejiannya itu ialah putri-putri Sweden, Denmark dan Norway yang bergambar secara bugil, sedangkan diatas leher-leher mereka tergantung tanda "salib" ..... Dan mengapa fihak misionari tidak juga mengarahkan usaha "dakwah" mereka kenegara ini semua ...?

### **Apa yang disampaikan fihak misionari kepada orang-orang Islam:**

Kita merasa hairan terhadap alasan pokok yang dimiliki oleh fihak misionari dimana mereka menyatakan bahawa tugas mereka adalah menyampaikan "hidayah" kepada orang Islam (Astaghfirullahal'azhiem) dan yang mereka maksudkan "hidayah" disini, ialah: bahawa kaum muslimin atau orang-orang Islam - menurut pendapat mereka - belum sampai kepada iman.

Dan meski kedustaan yang mereka buat ini memberi kesan yang

menyakitkan, kita kaum muslimin merasa kesal kepada fihak missionari yang membelanjakan berjuta-juta dollar ini, bahawa fihaknya telah berkhidmat kepada Al Masih (Nabi Isa a.s.), disaat mana kita (kaum muslimin) memaklumi bahawa Isa Al-Masih tidak terbabit dengan segala "kedunguan" itu, dan bahkan kita beriman sepenuhnya kepada Isa Al Masih itu. Kedunguan yang bercampur dengan kehinaan, dimana mereka mencaci-maki secara keji terhadap Nabi Muhammad SAW. Mereka menyifatkan-nya dengan berbagai-macam sifat yang buruk-buruk, disamping mereka menyerang Alqur'anul Kariem serta menyayi apa-apa yang terkandung didalamnya. Padahal bagi kita - kaum muslimin - semua hakikat menguatkan bahwa apa-apa yang terdapat didalam Injil yang beredar diantara mereka, tidak ada hubungan langsung dengan Nabi Isa Al Masih as dan tidak pula ditulis atau didiktekan perkara itu kepada mereka.

Dan merupakan kewajiban fihak Vatikan, bila ianya hendak menyeru kepada kedamaian, keselamatan dan kasih-sayang yang sebenarnya, untuk ikut-serta menghentikan missi yang telah berlaku sangat keterlaluan disaat ini di Afrika, Asia Tenggara yang Islam.

Tetapi amat disayangkan dan patut dikesalkan bahwa fihak Vatikan itu tidak melakukan atau mengambil berat perkara itu. Apabila ini yang hendak dilakukan oleh fihak mereka dengan penuh kedengkian terhadap agama Islam, maka ini adalah suatu bahaya yang besar.

### **Apa yang diperbuat Vatikan bersama Israel**

Kita kaum muslimin ada firasat,

bahwa dunia Kristian sangat kesal dan dengki terhadap Islam dan kaum muslimin. Dan dari sudut yang lain, mereka membawa perasaan kasih-sayang dan memberikan dukungan penuh kepada fihak Israel.

Disaat kita mengetahui ada semangat kerjasama semacam itu diantara dunia Kristian dan Israel, maka kita sampai kepada hakikat yang penting, yaitu bahwa Israel telahpun memiliki berbagai pengaruh didalam Vatikan sendiri ..... Pengaruh ini yang membuat Yahudi bebas atau selamat dari darah Isa Al Masih yakni termasuk bebas dari segala dosa.

Kita merasa hairan, apakah fihak Vatikan merasa takut kepada Israel? Dan apakah kerana takutnya mereka itu kepada Israel, maka mereka mengadakan kerja-sama dengannya sampai keperingkat yang mesra dan muhibbah semacam itu didalam memusuhi Islam ..... Kemudian, apakah ini yang patut dialami oleh kaum muslimin, yang menghormati Isa Al Masih as dan ibundanya Maryam (Maria) ... padahal Israel menyifatkan Isa Al Masih dan ibundanya Maria dengan sifat-sifat yang tidak patut kita sebutkan disini, kerana begitu keji-nya .....

Selanjutnya, dunia Katholik mengakui Yahudi, dan tidak mengakui Islam. Dan mengapa misalnya, Yahudi diberi hak dalam masyarakat Kristian, dan masyarakat ini tidak memberikan hak apapun kepada masyarakat Islam yang minoriti ....

Perbincangan ini akan berkepanjangan .... Banyak sudah para penulis mencatat perkara-perkara ini ..... Syaikhul Azhar (Allah Yarham), Ulama-Ulama Al Azhar, fihak Rabithah Alam Islami dan Lembaga-Lembaga keagamaan

---

di Kuwait serta masih banyak lagi, dengan memberikan peringatan dan perhatian masing-masing. Tetapi nampaknya sampai kini: perhatian tiada memberi arti, dan peringatan tidak membawa faedah apa-apa sama sekali .....

Maka bilamana fihak Vatikan masih mengharapkan kedamaian sebagaimana mereka nyatakan, sepatutnyalah mendesak kaki-tangan mereka untuk tidak memerangi Islam dan kaum Muslimin, dan sekaligus menghentikan operasi "busuk"nya itu ditengah-tengah masyarakat Islam, yang membuat suasana menjadi panas serta kesan yang menakutkan terhadap dunia Islam, meski tidak terdapat undang-undang atau peraturan kita yang mengharamkan adanya misi Kristian di dunia Islam.

Dan masih ada lagi yang lebih menghairankan, apakah kerja-kerja misi dengan bagi-baikn buku-buku atau majalah-majalah sex itu, supaya kaum muslimin berubah dari agam mereka, kemudian pindah kepada suatu kefahaman yang kita tidak kenal ujung pangkalnya, dan hakikat serta kenyataannya atau gambaran yang boleh difahami oleh akal fikiran itu?

Sepatutnya fihak Vatikan menyeru kearah menghormati minoriti Islam

ditengah-tengah masyarakat non muslim. Inilah cara hakikat yang wajib dialui oleh fihak Vatikan bila ia memang menggalakkan perkara "kedamaian dan kemanusiaan" itu.

Bila fihaknya tidak suka terhadap perkara ini - atau tidak memiliki kebolehan untuk itu - maka tidak ada artinya atau faedahnya mengadakan "dialog agama", dan tak ada manfaatnya "kenyataan-kenyataan" yang tebal itu .....

Dan dengan demikian perkara itu, kita serahkan saja kepada Allah SWT. Rabbul Alamien Yang Maha Mulia dan Maha Tinggi, yang tiada sekutu bagi Nya, dan tiada pula berputera, yang telah diyakini oleh semua orang-orang Islam ..... dan pasti IA nya menolong orang-orang mukmin serta IA Maha Mengetahui sesiapa yang selain itu .....

Akhirnya, minta maaf ..... sesungguhnya Allah SWT. pasti mengancurkan selain orang-orang yang beriman, semoga ini berlaku cepat .....

Maali Abdul Hamid Hamudah  
(Rabithah Alam Islami,


No. 11, Zul qa'dah 1401H).

Alih Bahasa: Hj. Baharuddin Mansui

---

"Dan ingatlah, ketika Ibrahim berkata: "Ya Tuhanku! Jadikanlah negeri ini (Mekah), negeri yang aman, dan jauhkanlah aku beserta anak cucuku daripada menyembah berhala-berhala." (QS Ibrahim 35).-

---



---

## DOA

---



*Berdoa yang ditentukan ialah memohon kepada tuhan.*

---

# KEKUATAN DOA

وَإِذَا سَأَلَكَ عِبَادِي عَنِّي فَإِنِّي قَرِيبٌ أُجِيبُ دَعْوَةَ الدَّاعِ  
إِذَا دَعَا عَن قَلْبِهِ فَاسْتَجِبُوا لِي وَلِيَوْمَنُوبًا لِّعَلَّهِمْ يَرْشُدُونَ

(البقرة: ١٨٦)

“Dan bila hamba-hambaKu bertanya kepada engkau (Ya Muhammad) tentang Aku, maka sesungguhnya Aku dekat. Aku memperkenankan doa orang yang bermohon, apabila ia berdoa kepada-Ku. Sebab itu, dengarlah seruan-Ku dan berimanlah kepada-Ku, mudah-mudahan mereka mendapat petunjuk.”

(Al-Baqarah: 186)

## Perintah Berdoa

Baik didalam Al-Quran maupun didalam Hadis banyak dijumpai keterangan yang memerintahkan supaya manusia berdoa kepada Tuhan. Diantaranya: "Berdoalah kepada Tuhan dengan merendah diri dan suara yang lembut. Sesungguhnya Allah tidak menyukai orang-orang yang melampaui batas." (AL-A'RAF: 55)

Dan janganlah kamu membuat kerusakan di muka bumi, sesudah (Allah) memperbaikinya dan berdoalah kepada-Nya dengan perasaan takut dan penuh harapan. Sesungguhnya rahmat Allah dekat kepada orang-orang yang berbuat kebajikan." (Al-A'raf: 56)

مَنْ فَتِحَ لَهُ بَابُ الدُّعَاءِ  
فَتَحَّتْ لَهُ أَبْوَابُ الرَّحْمَةِ  
وَمَا سَأَلَ اللَّهَ تَعَالَى شَيْئًا  
أَحَبَّ إِلَيْهِ مِنْ أَنْ يَسْتَلَّ  
الْعَاقِبَةَ وَإِنَّ الدُّعَاءَ يَنْفَعُ  
مِمَّا نَزَلَ وَمِمَّا يَنْزِلُ وَلَا يَرُدُّ  
الْقَضَاءُ إِلَّا الدُّعَاءَ فَعَلَيْكُمْ  
بِالدُّعَاءِ .

(رواه الترمذی)

Adapun didalam Hadis dijelaskan: "Barang siapa yang dibukakan pintu doa baginya berarti dibukakan pula baginya segala pintu rahmat. Doa yang amat di sukai Tuhan adalah permohonan aflatun. Doa itu mendatangkan manfaat

terhadap sesuatu yang sudah atau belum diturunkan Tuhan. Tidak ada yang dapat menolak qadha (ketentuan Tuhan), kecuali doa, oleh sebab itu berdoalah."

(H.R. Turmuzi)

Pada Hadis yang lain ditegaskan:

الدُّعَاءُ مَخُّ الْعِبَادَةِ .

(رواه البخاری)

"Doa itu adalah inti ibadah" (Riwayat Bukhari)

## Makna dan Hakikat Doa

Perkataan doa berasal dari kata pokok da'aa. Ertinya menurut ilmu - bahasa bermacam-macam, tergantung pada susunan dan tujuan kalimat. Ada kalanya dengan makna-makna ibadat, meminta pertolongan, memanggil, memohon.

Doa yang dimaksudkan disini ialah dengan makna memohon. Iaitu, permohonan atau permintaan seorang hamba kepada Tuhan yang menciptakannya.

Didalam kehidupan ini, manusia memerlukan pada landasan yang dapat menenteramkan jiwanya, atau tali yang boleh dijadikan harapan perpegannya. Landasan dan tali yang dimaksud itu ialah doa.

Pada hakikatnya, berdoa itu adalah menjadi fitrah (tabiat) bagi manusia. Dalam hubungan ini Afif Abdul Fattah Al-Tabbarah menyatakan: "Berdoa itu adalah satu Fitrah dalam diri manusia. Manusia senantiasa ingat dan rindu kepada Allah yang akan memberikan perlindungan kepadanya diwaktu kesulitan atau menghindarkan sesuatu kejahatan. Berhadapan dengan

peristiwa-peristiwa kehidupan ini, manusia itu sangat lemah. Tidak ada sandaran bagi kelemahan itu, kecuali berdo'a."

Seirama dengan rumusan itu, Harold Sherman menyatakan dalam bukunya "Power of Prayer" (Kekuatan Doa).

"It is instinctive for man, when he encounters conditions and circumstances beyond his control, to pray to a higher power for help." Maksudnya: Sudah menjadi naluri manusia, memohonkan doa untuk meminta pertolongan kepada kekuasaan yang lebih tinggi, apabila ia berada dalam suatu keadaan dan suasana, yang sudah tidak dapat dikendalikannya."

Tentang tabiat manusia yang berhajat pada doa itu dilukiskan oleh Tuhan didalam Al-Quran:

وَإِذَا مَسَّ الْإِنْسَانَ الضَّرَّ  
دَعَا نَجْوَاهُ أَوْ قَادِرَ  
أَوْقَاتِهِ فَلَمَّا كَشَفْنَا عَنْهُ  
ضُرَّهُ مَرَّ كَأَن لَّمْ يَدْعُنَا  
إِلَى ضُرِّهِ مَتَى كَذَلِكَ لَكِ  
لِلْمُتَّقِينَ مَا كَانُوا يَعْمَلُونَ

• (يونس: ١٢).

"Dan kalau manusia itu ditimpa bahaya, dia mendoa kepada kami, diwaktu duduk atau diwaktu berdiri. Tetapi setelah kami hilangkan bahaya itu dari padanya, dia berjalan seolah-olah tidak pernah mendoa kepada kami atas bahaya yang telah menyinggungnya itu.

Begitulah orang-orang yang melampaui batas itu memandang baik apa yang selalu mereka kerjakan."

(Yunus: 12)

Sudah jelas bahwa berdo'a itu adalah satu hajat rohaniyah yang diperlukan oleh manusia dalam kehidupan ini, lebih-lebih tatkala ditimpa oleh kesusahan, kesulitan, malapetaka dan lain-lain.

### Berdoa Diwaktu Senang dan Susah

Kebanyakan manusia baru berdo'a kepada Tuhan apabila ia mendapat kesusahan atau ditimpa bencana. Akan tetapi, apabila keadaannya senang atau mendapat nikmat, jangankan berdo'a, malah dia sama sekali melupakan Tuhan. Disangkanya nikmat yang diperolehnya itu hasil titik peluh atau kepandaiannya sendiri. Padahal tanpa pertolongan Tuhan dia tidak akan mengenyam nikmat itu.

Sikap jiwa yang demikian hanya memandang dan mempergunakan doa itu sebagai tempat lari untuk memperoleh jalan keluar dari sesuatu kesulitan yang sedang dihadapi. Dengan demikian, dia meletakkan doa itu tidak pada fungsinya sebagai satu ibadah yang harus dikerjakan dengan tertib dan berlanjutan, tanpa memandang waktu dan keadaan. Sikap dan sifat itu rupanya telah menjadi tabiat manusia, seperti yang dilukiskan sendiri oleh Tuhan didalam Al-Quran:

وَإِذَا أَنْعَمْنَا عَلَى الْإِنْسَانِ أَعْرَضَ  
وَنَابِهَانِيهِ وَإِذَا مَسَّهُ الْضُرُّ  
فَذُودًا عَاءً عَرِيضًا

• (فصلت: ٥١)

“Apabila kami berikan nikmat kepada manusia itu, dia memalingkan diri dan berlaku sombong, tetapi apabila bahaya datang menimpanya, maka dia (memohonkan) doa panjang lebar.”  
(Fussilat: 51)

Bagaimanakah seharusnya sikap seorang mukmin?

Seorang Mukmin haruslah berdoa, baik diwaktu susah mahupun diwaktu senang. Malah berdoa diwaktu senang mempunyai hubungan-pengaruh dengan doa yang dipohonkan diwaktu susah. Didalam sebuah Hadis yang diriwayatkan oleh Turmuzi dinyatakan: “Barang siapa yang ingin supaya dikabulkan Tuhan doanya diwaktu mendapat kesusahan, hendaklah dia banyak berdoa diwaktu dalam kesenangan.”

## **Doa dan Perkembangan Rohaniah**

Dilihat dari sudut kejiwaan, doa itu mempunyai pengaruh terhadap perkembangan rohaniah, membuat rohaniah semakin tenang dan kuat, mampu dan mempunyai daya-tahan untuk membendung desakan-desakan keinginan jasmaniah. Doa itu juga membentangkan tali-pegangan bagi manusia, memperkuat semangat berjuang dan mendatangkan pengharapan. Sebagai diketahui keadaan lahiriah atau jasmaniah manusia adalah ditentukan oleh keadaan jiwanya, rohaniahnya.

Percubaan-percubaan dan juga penyelidikan-penyelidikan secara ilmiah terhadap pengaruh dan kekuatan doa itu membentuk rohaniah manusia, telah diakui oleh beberapa pakar. Disini kita kemukakan kesimpulan dari dua orang pakar dalam lapangan tersebut.

Pertama, seorang penganut ugama - malah pendita Kristian - yang telah mencapai taraf antara-bangsa di dalam bidang-bidang kehidupan rohaniah itu. Namanya Dr. Norman Vincent Peale, pengarang berbagai-bagai buku di bidang tersebut.

Kedua, Dr. Alex Carrel, seorang doktor pakar-jiwa yang termashor pada abad ini.

Dr. Norman Vincent Peale mengatakan: “Kekuatan doa adalah manifestasi dari tenaga. Seperti juga adanya cara-cara ilmiah untuk mengembangkan tenaga rohani dengan jalan doa, demikian pula ada proses-proses ilmiah untuk mengembangkan tenaga jasmani dengan jalan doa. Bukti-bukti tentang kekuatan doa itu dijumpai secara menyeluruh. Kekuatan doa itu ternyata sanggup menormalisir proses ketuaan, mencegah membatasi kerosakan-kerosakan jasmaniah. Tidak perlu anda kehilangan sumber tenaga atau kekuatan, atau lemah dan lesu hanya semata-mata kerana usia anda bertambah. Tidak perlu anda membiarkan semangat anda melembab. Doa dapat juga menyegarkan anda setiap pagi untuk menghadapi pekerjaan. Anda akan menerima pimpinan untuk memecahkan segala macam masalah; jika anda meresapkan doa memasuki bawah-sedar anda, sebab ianya merupakan sumber kekuatan yang menentukan: adakah tindakan-tindakan anda benar atau keliru. Doa mempunyai kekuatan untuk memelihara reaksi-reaksi anda yang tepat dan sihat. Doa yang anda tanapkan dalam-dalam kebawah sadar anda akan menjadikan anda manusia baru. Doa akan mengembalikan kekuatan-kekuatan anda dan mengalirkan kekuatan tersebut

secara bebas." (dikutip dari The Power of Positive Thinking).

Kesimpulan pakar yang kedua, iaitu Dr. Alex Carrel, diuraikan dalam bukunya yang berjudul 'Man The Unknown' (Manusia Makhluk Yang Tidak Dikenali) sebagai berikut: "Doa adalah bentuk tenaga yang maha-kuat yang dapat dilaksanakan oleh manusia. Tenaga itu dalam kenyataannya tidak ubahnya seperti graviti. Sebagai seorang Doktor pakar jiwa, saya mempersaksikan, bahwa pesakit-pesakit yang tidak dapat diubah dengan segala macam cara perawatan, dapat sembuh dengan tenaga tenteram yang terkandung dalam doa. Doa, adalah laksana radium yang mengandungi sumber tenaga yang bercahaya dan membangunkan. Didalam doa, manusia berusaha menambah tenaganya yang terbatas dengan jalan berpaling pada sumber tenaga yang tidak ada batasnya. Apabila kita berdoa, kita berhubungan dengan tenaga-dokong yang menggerakkan alam semesta. Kita berdoa supaya sebahagian dari kekuatan itu dicurahkan untuk keperluan kita.

Hanya dengan jalan berdoa, kekurangan insani kita diisi, dan setelah bangun lalu terasa kuat dan sihat. Setiap kali kita berdoa dengan khusyuk kepada Tuhan, maka rohani dan jasmani kita terasa berubah pada keadaan yang lebih baik. Setiap laki-laki dan wanita merasakan pengaruhnya yang baik."

Mahatma Gandhi, bapa kemerdekaan India yang terkenal, pernah menyatakan: "Tanpa doa sudah lama saya gila."

### **ADAB BERDOA**

Imam Ghazali menyimpulkan bahawa adab berdoa itu terdiri sepuluh perkara.

1. Pada waktu yang mulia, seperti hari - Arafah, bulan Ramadhan, hari Jum'at, waktu sahur dan lain-lain.
2. Dalam keadaan yang berkhidmat, seperti waktu sujud dalam sembahyang, ketika hati tenang dan bersih dari gangguan-gangguan syaitan.
3. Menghadap kiblat dan mengangkat kedua tangan sampai pada garis (kelihatan) ketiak.
4. Merendahkan suara, iaitu antara suara keras dengan berbisik sekadar dapat didengar oleh orang-orang yang ada disisi kita.
5. Tidak perlu memakai kata-kata yang bersajak di dalam doa, cukup dengan kata-kata bahasa yang sederhana saja, yang menunjukkan kerendahan hati. Tidak perlu dilagukan, tidak perlu memakai irama dan lain-lain. Lebih diutamakan apabila mengucapkan doa-doa yang berasal dari Rasulullah, sahabat dan tabiin.
6. Merendah diri serta menundukkan hati (khusyuk)
7. Mempercayai bahawa doa yang dimohonkan itu akan diperkenankan Tuhan dan tidak usah kecewa atau gelisah apabila apa yang didoakan itu belum dikabulkan Allah.
8. Memulai doa dengan memuji Allah dan bersalawat kepada Nabi serta diakhiri dengan salawat dan pujian pula padaNya dan janganlah dimulai langsung menyebutkan apa yang kita mohonkan.
9. Melaksanakan adab batin yang menjadi pokok sebab-sebab diperkenankan doa kita iaitu melakukan taubat sebelum bermohon dan menghadapkan diri sepenuhnya

kepada Allah.

## DOA YANG MEROSAK

Isi dan kandungan suatu doa itu pada umumnya hendaklah yang mengandung kebaikan. Dilarang memohonkan doa tentang hal-hal yang merosak dan mencelakakan terhadap orang lain. Umpamanya, apabila seseorang sudah jemu hidup didunia ini, sebab bertubi-tubi ditimpa kesulitan demi kesulitan, tidaklah boleh dia memohon doa: "Ya, Allah! Cabutlah lekas nyawaku. Aku tidak tahan lagi dipukul oleh gelombang kesusahan."

Juga dilarang mendoakan orang lain supaya mendapat kecelakaan. Umpamanya, mendoakan terhadap lawan: "Ya, Tuhan! Lumpuhkanlah seluruh badannya!"

Adapun mendoakan pihak yang zalim supaya mendapat kecelakaan, seumpama mendoakan agar suatu regim yang bersifat kejam, zalim dan sewenang-wenang jatuh dari kekuasaannya, tidak dilarang. Sebab motif dalam memohon doa itu ialah untuk kemaslahatan umum, iaitu supaya rakyat yang ramai lepas dari penderitaan kezalimannya.

Dalam pergaulan hidup sehari-hari, acap kali juga kita mendengar ucapan-ucapan yang bernada doa, yang sifatnya menyumpah-nyumpah, sebab kesal atau kecewa terhadap sesuatu keadaan. Umpamanya seorang ibu yang kesal melihat perangai anaknya lalu secara tidak sedar dan dengan perasaan yang tidak dapat dikawal dia berkata: "Hendaknya engkau mati disambar petir", dan lain-lain sebagainya.

Larangan terhadap doa yang demikian dalam hadis yang berbunyi:

وَلَا تَدْعُوا عَلَيَّ أَنْتُمْ وَلَا تَدْعُوا  
عَلَىٰ أَوْلَادِكُمْ وَلَا تَدْعُوا عَلَيَّ  
خَدْمِكُمْ وَلَا تَدْعُوا عَلَيَّ أَمْوَالِكُمْ  
لَا تَوَافِقُوا مِنَ اللَّهِ تَعَالَىٰ  
سَاعَةً قَبْلَ فِيهَا عَطَا  
فَيَسْتَجَابُ مِنْكُمْ .

(رواه ابوداود )

"Janganlah kamu mendoakan kecelakaan untuk dirimu, anak-anakmu, pelayanmu, harta-bendamu. Bolehjadi permintaan yang demikian tepat dengan saat-saat makbul, maka ia memperkenankan doamu itu."

(H.R. Abu Daud)

## DOA YANG DIKABULKAN

Syarat yang penting dalam berdoa itu ialah kesucian hati, keikhlasan. Jangan hanya mulut saja yang bergerak-gerak memohon doa, tetapi hati dan jiwa sama sekali tidak menghadap (tawajjuh) kepada Allah.

Selain daripada itu, dikehendaki pula supaya diri bersih dari dosa, tidak makan dari barang yang haram, Sa'ad bin Abi Waqas pernah menanyakan kepada Rasulullah: "Apakah syarat supaya doa yang kupohonkan dikabulkan Tuhan?" Rasulullah menjawab diantaranya: "Makanlah dari harta yang halal, nescaya doa yang engkau pohonkan akan diperkenankan Allah."

Tiap-tiap doa yang dipohonkan kepada Tuhan dengan ikhlas dan memenuhi syarat-syaratnya, ada

kalanya dikabulkan Tuhan secara langsung, sesuai dengan apa yang kita pohonkan itu. Adakalanya diberikannya hal yang serupa, dan adakalanya diperkenankanNya dengan menghindarkan sesuatu bencana yang akan menimpa kepada pemohon sendiri.

Hal ini dilukiskan dalam sebuah Hadis yang berbunyi: "Tidak ada seorang Muslim dimuka bumi ini yang berdoa kepada Allah, melainkan Allah

memperkenankan sesuai dengan hal yang dipohonkannya itu, atau dihindarkan Tuhan daripadanya sesuatu kejahatan (kecelakaan) yang seumpama itu, selama dia tidak mendoakan sesuatu yang mengandung dosa atau memutuskan silaturrahim.

(H.R. Turmuzi)

Oleh: Syed Muhammad Alatas.

عَنْ أَبِي الدَّرْدَاءِ رَضِيَ اللَّهُ عَنْهُ أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ كَانَ يَقُولُ :  
( دَعَاؤُ الْمُسْلِمِ لِأَخِيهِ بِظَهْرِ الْغَيْبِ مُسْتَجَابٌ ، عِنْدَ رَأْسِهِ  
مَلَكٌ مُوَكَّلٌ ، كَمَا دَعَا أَخِيهِ وَخَيْرٌ قَالَ الْمَلَكُ الْمُوَكَّلُ بِهِ ، آمِينَ  
وَلَكَ مِثْلُ ذَلِكَ ) . رواه مسلم

Dari Abi Dardak R. A; bahwa adalah Rasulullah bersabda: Doa seorang Muslim untuk saudaranya yang tidak ada bersamanya, diperkenankan. Di-kepalanya ada seorang malaikat yang diwakilkan padanya setiap kali ia berdoa bagi saudaranya dengan kebaikan, berkatalah malaikat yang di- wakilkan padanya, perkenankanlah ya Allah dan bagiMu (wahai orang yang mendoakan) seperti itu juga. (H.R Muslim)



## Ruang Muslimah

# BERNARKAH WANITA LEMAH AQAL DAN AGAMANYA DIBANDING DENGAN LAKI-LAKI

---

Alih Bahasa Oleh: Ustaz Rohani Awi Petikan dari Akhbar Alam Islami.

---


Kita selalu mendengar sabda Rasulullah SAW dalam sebuah Hadisnya yang mulia:

Bermaksud: "Wanita lemah dari segi aqal dan agama."

Dengan demikian terdapatlah segolongan kaum lelaki yang kurang bertanggungjawab merendah-rendahkan taraf wanita.

Keterangan Hadis Rasulullah SAW bahawasanya beliau bersabda: "Saya tidak melihat seorang daripada kamu yang lemah aqal dan agamanya dapat mengatasi kepintaran lelaki yang teguh amalnya, beliau pun di tanya: "Wahai Rasulullah apakah yang menyebabkan kekurangan aqalnya?" Beliau berkata: (Bukankah saksi dua orang wanita menyamai saksi seorang lelaki). Kemudian beliau ditanya lagi: "Wahai Rasulullah apakah kelemahan agamanya?" Beliau berkata: (Bukankah apabila seseorang wanita itu haidh ia tidak wajib sembahyang dan puasa). Nabi

alaihissalatu wassalam menerangkan bahawa kelemahan akal nya ialah di sebabkan kelemahan ingatannya dan kesaksiannya terpaksa di tambah dengan saksi seorang wanita lain, ini adalah untuk membuktikan dan menguatkan kesaksiannya kerana kadang-kala ia lupa dan perlu ditokok tambahan bukti kesaksiannya. Dan kelemahan agamanya ialah kerana apabila seorang wanita itu dalam keadaan haidh dan nifas ia terpaksa meninggalkan sembahyang dan puasanya dan tidak diwajibkan mengadakan sembayangnya, inilah yang di maksudkan dengan kelemahan agamanya, tetapi kelemahannya di segi ini di maafkan kerana ini adalah hasil dari hukum syara' yang di tetapkan oleh Allah azza wa jalla, sebagai rahmat dan kemudahan baginya kerana apabila ia puasa dalam keadaan haidh dan nifas akan memudharatkan kesihatannya, dan dengan rahmat Allah juga ia dibolehkan meninggalkan puasanya. Dan larangan



*Wanita juga memegang peranan yang penting setarap dengan kaum lelaki.*

supaya seseorang wanita itu meninggalkan sembahyangnya kerana dalam keadaan uzur yang tersebut diatas, terdapat sesuatu tegahan yang membolehkan ia bersuci, dan di haruskan ia supaya tidak mengadakan sembahyangnya kerana jika diwajibkan supaya ia mengada sembahyangnya, mungkin akan menimbulkan kepayahan bagi dirinya. Ini ialah disebabkan sembahyang dilakukan berulang-ulang, lima kali sehari semalam, sedangkan waktu haidh dan nifas mengambil masa yang panjang, ada kalanya hingga empat puluh hari, dan dengan rahmat Allah dan lisan-Nya terhadap wanita, Allah telah menggurukan hukum sembahyang tunai dan qada, yang tidak menunjukkan kelemahan akalNya atau agamanya dalam semua segi. Bahkan Rasulullah

SAW menerangkan bahawa kelemahan akalNya ialah di sebabkan kelemahan ingatannya, dan kelemahan agamanya pula kerana seseorang wanita itu apabila dalam keadaan uzur syara' ia terpaksa meninggalkan sembahyang dan puasanya. Dalam hal ini tidak melibatkan kaum lelaki, bahkan mereka lebih baik dari wanita di lapangan hafalannya dan ingatannya. Memang benar-kaum lelaki adalah lebih baik dari kaum wanita di segi ini, dan telah menjadi kajian sejarah Islam dan lain-lain, bahawa perkara ini ternyata di kalangan mereka yang mengambil perhatian tentang hal ehwal wanita di zaman Nabi SAW dan di zaman yang sesudahnya menurut seperti yang termaktub dalam firman Allah SWT didalam surah An Nisaa' ayat 34 yang berbunyi:

الرجال قوامون على النساء

بما فضل الله بعضهم على

بعض ويمانفقوامن أموالهم

(النساء : ٣٤)

Bermaksud: "Kaum laki-laki adalah pemimpin bagi wanita, oleh kerana Allah telah melebihkan sebahagian mereka (laki-laki) atas sebahagian yang lain (wanita), dan kerana mereka (laki-laki) telah menafkahkan sebahagian dari harta mereka.

Tetapi seperti yang tercatat di dalam sabda Rasulullah SAW kadang-kala wanita berjaya mengatasi laki-laki pada dua jurusan aqal dan agama. Kerana terdapat kebanyakan wanita yang beramal saleh dan bertaqwa kepada Allah lebih daripada kaum laki-laki, betapa lagi kedudukannya di akhirat. Terdapat juga wanita-wanita yang terlalu mengambil berat dalam sesuatu masalah sehingga membuat ia mengingatnya lebih daripada ingatan laki-laki akan masalah-masalah tersebut.

Di sini kita dapat fahamkan, yang dikatakan kelemahan (kekurangan) pada diri wanita itu tidak menghalang kita dari mempercayainya seperti riwayat hadis, dimana kesaksiannya terpaksa ia tambah dengan kesaksian wanita lain.

Sebagai hamba Allah yang baik dan bertaqwa di sisi Tuhannya, wanita tetap mengerjakan suruhan agamanya, walaupun ia tidak diwajibkan berpuasa tunai (ada'an) tidak juga diwajibkan menunaikan sembahyangnya (qada'an dan ada'an) iaitu ketika mereka sedang menanggung kedua-dua hadas besar (haidh dan nifas). Ini tidak berarti seseorang wanita itu kurang ketaqwa'annya dan keta'atannya di dalam melaksanakan tugas-tugas agamanya, bahkan ini adalah di sebabkan satu kekurangan yang khas seperti penerangan Rasulullah SAW dalam sabdany: "Tidak harus bagi seseorang mukmin itu memperkecil-kecilkan taraf wanita dari segi kelemahan aqal dan agamanya, dan perlu di insafai bahwa kelemahan wanita dalam lapangan ini adalah satu ketentuan dari Allah SWT kerana kasihNya dan rahmatNya terhadap wanita. Dan untuk memelihara kesihatan kaum wanita, maka Allah memudahkan sesuatu hukum bagi mereka dan meringankan tugas-tugas ibadat tertentu yang diwajibkan ke atas mereka. Firmannya:

Maksudnya: "Sesungguhnya Allah Maha Pengampun dan Maha Penyayang." Hakikat ini harus di sedari oleh wanita muslimah, dan mereka harus mensyukuri akan penghargaan Allah yang sangat besar terhadap mereka.

Wallahu Waliyuttaufik



*Tidur bukan saja merehatkan badan malah banyak ertinya pada kehidupan.*

---

*Dari wahyu  
"Kesihatan Islam"*

# "TIDUR" salah satu tanda-tanda kebesaran Allah

Mungkin diantara pembaca masih ada yang merasa hairan, bila ada yang menyatakan bahwa "tidur" itu adalah merupakan salah satu daripada tanda-tanda kebesaran Allah SWT. Tetapi bilamana kita perhatian secara teliti dari sudut kesihatan, kita akan dapat memahami secara mendalam makna kandungan firman Nya yang berbunyi:

وَمِنْ آيَاتِهِ مَنَامُكُمْ بِاللَّيْلِ  
وَالنَّهَارِ وَابْتِغَاؤُكُمْ مِنْ قَضِيهِ  
إِنَّ فِي ذَلِكَ  
لَآيَاتٍ لِقَوْمٍ يُسْمِعُونَ

• ( الروم ٢٤ )

**Yang bermaksud:**

Dan diantara tanda-tanda kekua-

saan Nya ialah tidurmu diwaktu malam dan siang hari dan usahamu mencari sebagian dari kurnia Nya. Sesungguhnya pada yang demikian itu benar-benar terdapat tanda-tanda bagi kaum yang mendengarkan.

(Surah Ar Ruum 24)

Ini bermakna, bahwa diantara tanda-tanda kebesaran Allah SWT. yang ditunjukkannya ialah "tidurmu diwaktu malam dan siang dan keinginan atau harapanmu terhadap kehidupan dengan segala iradah Nya." Tidaklah syak lagi bahawa tidur itu adalah "mati yang lebih kecil". Kesadaran, perasaan dan pemikiran kita hilang sementara kita tidur. Maka manusia meninggalkan dunia dengan segala isinya dan ianya bebas menikmati "rehat" disebahagian masanya itu, untuk kemudian kembali akan hidup semula dengan cergas dan aktif tanpa sesuatu yang membosankan, mencari kurnia Ilahi dan bekerja berusaha mencari rizqi. Maka siapakah yang mengembalikan ruhnya kepadanya lagi serta memberikan pemikiran, kesadaran dan perasaannya semula? Bukankah Allah SWT.?

Disitulah letak kebesaran Allah SWT., tetapi (barangkali hanya) bagi orang yang mau mendengar secara baik disertai pandangan yang jauh dan teliti.

Marilah untuk itu kita berhenti sejenak, sebab bersama kita ada satu perkara yang ada hubungan dengan kesihatan. Kita renungkan bersama, semoga dengan kurnia Nya dihadapan kita ada sinar diatas sinar, Insha Allah.

Ilmu pengetahuan moden telah menetapkan bahwa tidur itu penting bagi hidup, seperti juga pentingnya makan dan minum. Bahkan mungkin orang boleh sabar dengan menahan rasa lapar, tetapi

tidak dapat sabar menahan "tidur" yang akan memberikan ketenangan bagi gerak operasional dalam tubuh selama tidur, dimana tidak menghentikan atau merehatkan aktifitas anggota tubuh itu selama seharian sampai memulakan suatu aktifitas yang baru. Dan diantara bagian-bagian tubuh yang lebih banyak menghajatkan rehat ialah otak. Pengalaman dan kajian telah membuktikan bahawa denyutan atau goncangan yang berterusan akan mengakibatkan goncangan dan hilangnya ingatan dan kepribadian.

### **Maha Benarlah Allah Yang Berfirman:**

وَجَعَلْنَا نَوْمَكُمْ  
سُبَاتًا  
(النبا ٩)

### **Yang bermaksud:**

Dan kami jadikan tidurmu untuk berehat.

(Surah An Naba 9).

Yakni: Kami jadikan tidurmu seperti mati, dan ini dimaksudkan "terputus", sebagaimana "mati" memutuskan hidup, juga "tidur" memutuskan kepenatan dan penderitaan, maka ianya merupakan rehat bagi kamu sekalian.

Dan diantara cara "penganiayaan" yang dilakukan oleh orang-orang Cina dizaman dahulu serta bagi sebahagian para "pelampau" hukum sekarang ini ialah dengan "tidak memberikan masa untuk tidur secara terus-menerus."

Tidur itu tidaklah dianggap penting bagi manusia sahaja, tetapi juga bagi haiwan. Dari berita yang baru sahaja diperolehi, menyatakan bahawa pernah

dilakukan suatu percobaan terhadap kelompok anjing; dimana kelompok pertama diberikan makanan secukupnya kepada mereka, kemudian dilarang "tidur", dan kepada kelompok yang kedua lagi, dilarang untuk makan, tetapi dibiarkan mereka tidur. Sesudah masa lima hari, ternyata didapati bahawa anjing-anjing dari kelompok pertama tidak ada lagi yang mampu untuk bertahan hidup, sedangkan kelompok yang kedua masih boleh bertahan untuk tidak makan selama 20 hari.

Anda juga akan merasa hairan, bila mengetahui bahawa sampai sekarang ini belum juga diketahui tabiat tidur yakni rahsia operasinalnya secara kimiawi, mekanik dan kejiwaan yang menjadikan mengapa otak boleh bergerak secara sempurna dinisbatkan kepada apa yang wujud disekitarnya, dan juga tidak memindahkan sesuatu isyarat apapun untuk bekerja atau berfikir secara sadar. Para ahli penyelidik telah mencatat aliran elektrik yang dilepaskan oleh otak menerusi gambaran-gambaran otak secara elektrik pula. Dari gambaran-gambaran ini nampak gelombang-gelombang tetap disaat-saat dalam sadar, dan gelombang-gelombang perlahan yang sederhana pada masa tidur lelap, serta bentuk gelombang yang berbagai-macam bila tidur dalam keadaan ringan (tidak lelap). Namun demikian gambaran-gambaran itu belum mampu memberikan tafsiran segala rahsia yang terkandung itu, dan menempatkan teori-teori itu semua sekedar pada perkiraan sahaja. Dan kita tentunya tidak berhajat untuk menyebutkannya selama belum menyentuh perkara keperingkat yakin secara ilmiah.

Dan kita sudah sedia maklum,

bahawa bila kita hendak merangsang "tidur", kita mesti memberikan kepada "pesakit" obat tidur yang berbagai-macam. Dan dengan itu kita dapat melemahkan semangat pusat-pusat otak yang tertinggi dan bahagian otot-otot. Anda pasti menyadari keagungan apa yang terjadi terhadap orang yang tidur secara tabi'i, tanpa obat perangsang tidur atau obat tidur itu.

### **Masa tidur itu berbeda sesuai dengan perbedaan usia dan kepribadian:**

- orang tua menghajatkan masa tidur 20 jam setiap hari,
- kanak-kanak dari usia 1 sampai 4 tahun menghajatkan tidur selama 12 jam,
- yang berusia diantara 4 sampai 12 tahun perlu masa tidur 10 jam setiap hari,
- bagi belia, maka menghajatkan kepada 9 jam setiap hari.

Dan terkadang sebahagian orang masih menyangka bahawa orang yang telah lanjut usianya tidaklah menghajatkan tidur kecuali hanya 5 jam sahaja. Pendapat ini sebenarnya keliru, sebab ternyata bahawa mereka menghajatkan lebih daripada itu, bagi memberikan mereka lebih cergas dan aktif.

Dan untuk makluman bersama, bahawa jasmani tidak mengambil faedah apa-apapun kecuali daripada keadaan tidur yang lelap. Adapun tidur yang terputus-putus dan dalam keadaan tidak tenang, sama sekali tak ada faedah atau artinya, meski ianya mengambil masa yang panjang. Dan tidak diragukan lagi bahawa masa tidur yang lebih baik adalah diwaktu malam hari, dimana segala ketenangan menyeluruh, kemu-

dian diwaktu tengah hari dan seterusnya bila-bila masa manusia sangat mengha-  
jatkan tidur. Dan setiap kali manusia  
tidur awal, kemudian terbangun dalam  
keadaan aktif dan cergas, maka akan  
menjadikan dirinya boleh bekerja penuh  
seharian tanpa ada tekanan apapun atau  
emosional atau perasaan penat pada  
khasnya. Dan saat-saat yang ber-  
sempena dengan sholat subuh, itulah  
keadaan oxygen diudara lebih bersih  
dibanding daripada waktu-waktu yang  
lain. Dan sebaliknya orang yang tidur  
terlambat atau tidur akhir, apakah ianya  
memahami "syaitan-syaitan malam itu?"

### Masalah "tidak tidur"

Selama kita membincangkan masalah "tidur" ini, eloklah juga kitapun membincangkan masalah "tidak dapat tidur" semalam-malaman, yakni penyakit "terkutuk" yang menjadi salah satu racun dari bilangan racun-racun abad ini, dimana "suara material begitu tinggi dan keras menjadikan susana kehidupan dibeberapa negara merupakan "bengkel" yang tiada terdengar suara apa-apa kecuali "suara bising" dan "hiruk-pikuk" yang merusakkan urat-syaraf serta menghilangkan kemampuan berkonsentrasi bagi manusia. Dan pada hakikatnya manusia itu, bilamana telah jauh dari Allah SWT., ianya akan dekat dari "tidak dapat tidur" dan "kepenatan jiwa"; serta bilamana ianya dekat dengan Allah SWT. dan mengenali Nya, maka ianya akan merasakan kesejukan keyakinan, keselamatan thumakninah dan sakiinah, dan akan merasakan arti keridlaan yang membuat dirinya dapat merasakan kebahagiaan, meski tidak memiliki apapun kecuali yang dimakan seharinya. Makna dan arti semacam ini

tidak ada yang mengetahuinya kecuali orang-orang yang digambarkan oleh Allah SWT. dalam Al-Qur'an sebagai berikut:

الَّذِينَ آمَنُوا وَتَطْمَئِنُّ قُلُوبُهُمْ  
بِذِكْرِ اللَّهِ أَلَا بِذِكْرِ اللَّهِ  
تَطْمَئِنُّ الْقُلُوبُ  
الَّذِينَ آمَنُوا  
وَعَمِلُوا الصَّالِحَاتِ طُوبَىٰ  
لَهُمْ وَحَسَنَ مَأْوٍ (الحج: ٢٨-٢٩)

### Yang bermaksud:

(yaitu) orang-orang yang beriman dan hati mereka menjadi tenteram dengan mengingat Allah. Ingatlah, hanya dengan mengingat Allah lah hati menjadi tenteram. Orang-orang yang beriman dan beramal shaleh, bagi mereka kebahagiaan dan tempat kembali yang baik. (Surah Ar Ra'ad 28/29)

Adapun bagi orang yang memiliki jiwa yang rusak dari iman kepada Allah SWT. dan menjadi sahabat dari hawanafsunya serta keasyikan syahwat bersuka-ria dan berpesat-pora, sebagaimana makannya haiwan-haiwan dan yang neraka tempat kembalinya; mereka itulah yang orientasinya kepada materialisme didunia fana ini. Salah satu diantara mereka itu, adalah yang hidupnya seperti "anjing" bilamana anda menghalaunya, maka diulurkannya lidahnya, dan jika anda membiarkannya, diapun mengulurkan lidahnya (juga). Allah SWT. berfirman:

وَأَتْلُ عَلَيْهِمْ نَبَأَ الَّذِي آتَيْنَاهُ

آيَاتِنَا فَانْسَلِّحْ مِنْهَا فَاتَّبِعْهُ  
 الشَّيْطَانُ فَكَانَ مِنَ الْغَاوِينَ .  
 وَلَوْ شِئْنَا لَرَفَعْنَاهُ بِهَا  
 وَلَكِنَّهُ أَخْلَدَ إِلَى الْأَرْضِ  
 وَاتَّبَعَ هَوَاهُ فَمَثَلُهُ كَمَثَلِ  
 الْكَلْبِ إِذَا تَحَمَّطَ  
 يَلْهَثُ أَوْ تَرَكَهُ يَلْهَثُ  
 ذَلِكَ مَثَلُ الْقَوْمِ الَّذِينَ  
 كَذَّبُوا بِآيَاتِنَا فَاقْصُصِ  
 الْقِصَصَ  
 لَعَلَّهُمْ يَتَفَكَّرُونَ  
 (الأعراف ١٢٥/١٢٦)

### Yang bermaksud:

Dan bacakanlah kepada mereka berita orang yang telah Kami berikan kepadanya ayat-ayat Kami (pengetahuan tentang isi Al Kitab), kemudian dia melepaskan diri daripada ayat-ayat itu, lalu dia diikuti oleh syaitan (sampai dia tergoda), maka jadilah dia termasuk orang-orang yang sesat.

Dan kalau Kami menghendaki, sesungguhnya Kami tinggikan (derjat)nya dengan ayat-ayat itu, tetapi dia cenderung kepada dunia dan menurutkan hawa nafsunya yang rendah, maka perumpamaannya seperti anjing, jika kamu menghalaukannya, diululkannya lidahnya, dan jika kamu membiarkannya, dia mengulurkan lidahnya (juga).

Demikian itulah perumpamaan orang-orang yang mendustakan ayat-ayat Kami. Maka ceritakanlah (kepada mereka) kisah-kisah agar mereka berfikir.

(Alqur'an Surah Al A'raf 175/176).

Macam mana mereka-mereka diserupakan oleh Allah dengan anjing-anjing itu, akan merasakan keridlaannya dan menikmati kebahagiaan dengan lezatnya? Sesungguhnya mereka telah "tertutup" dari Tuhan mereka.

### Masalah letak atau posisi tidur

Masalah letak atau posisi tidur, maka yang lebih baik adalah tidur secara miring kekanan. Adapun tidur secara miring kekiri, akan menambah beban berat kepada hati, kerana hasil atau akibat daripada tekanan perut besar dan limpa keatas hati tersebut dalam posisi semacam itu; juga keatas paru-paru sebelah kanan. Rasulullah SAW. berwasiat dengan tidur (berbaring) kesebelah kanan. Dan tidur diatas dada (tengkurap) banyak bahayanya, kerana dalam keadaan tidur semacam itu, terpaksa kita memalingkan leher kesalah satu sisi atau arah (kanan atau kiri), sehingga barulah kita boleh bernafas. Bila tidur diatas punggung (tertelingtang), akan menjadikan isi perut mengangkat penutup batas, dan nanti pada gilirannya akan menekan kurungan dada (tulang dada), dan manusia akan merasakan sesak nafas, bahkan bangun tidur dalam keadaan terkejut.

Allah Yarham Khalifah yang termasyhur dengan kesederhanaan dan keadilannya, iaitu: Umar Bin Abdul Aziz pernah berkata yang bermaksud:

Siangmu, hai yang tertipu  
 cuai dan lalai  
 Dan malammu senantiasa tidur  
 membuat anda binasa  
 Anda sibuk bekerja  
 dalam berbagai perkara  
 yang anda bencikannya  
 Ketahuilah  
 dibumi persada, bersama anda  
 hidup haiwan-haiwan juga.

**Cara mengatasi penyakit  
 “tidak tidur”**

Seolah-olah saya telah pun  
 merasakan, yang anda hendak  
 menanyakan perkara cara mengatasi  
 masalah “tidak tidur” itu, dimana saya  
 akan menjawab pertanyaan anda sebagai  
 berikut:

**Pertama:**

Perbaikilah hubungan anda dengan Allah  
 SWT. dan dengan sesama manusia lain-  
 nya; kemudian bersama ini ada beberapa  
 do’a yang boleh anda baca atau amalkan,  
 Insyallah ada kesan yang baik.

فمن خالد بن الوليد

رضى الله عنه أصابه الأرق ،

فقال رسول الله صلى الله

عليه وسلم : ألا

أعلمك كلمات ان قلتهم نمت

؟ قل :

اللهم رب السموات السبع

وما أظلت ورب الأرضين

وَمَا أَظَلَّتْ رَبِّ الشَّيَاطِينِ  
 وَمَا أَظَلَّتْ ، كُنْ لِي جَارًا  
 مِنْ شَرِّ خَلْقِكَ أَجْمَعِينَ  
 أَنْ يَفْرُطَ عَلَيَّ أَحَدٌ مِنْهُمْ  
 أَوْ أَنْ يَطْفُسَ عَزَّجَارِكَ  
 وَتَبَارَكَ اسْمُكَ  
 . فِقَالَهُن فَنَامَ

**Yang bermaksud:**

Dari Khalid Ibnu Walid ra bahwasanya ia  
 terkena (penyakit) “susah tidur”. Maka  
 Rasulullah SAW. bersabda: “Ketahuilah,  
 aku akan mengajarkan kepada engkau  
 kalimah (do’a) yang bilamana engkau  
 baca, engkau akan (mudah) tidur.  
 Bacalah:

“Ya Allah, Tuhan langit yang tujuh dan  
 apa-apa yang dinaungi, Tuhan bumi dan  
 apa-apa yang digerakkan, dan Tuhan  
 syaitan serta apa-apa yang di sesatkan.  
 jadikanlah bagiku satu pelindung dari ke-  
 jahatan makhluk Mu semua, yang akan  
 mempercepat gangguan salah seorang  
 diantara mereka keatasku atau yang  
 akan melampaui batas perlindunganmu  
 yang mulia dan nama-Mu Yang Maha  
 berkat.”

Maka dia bacakan (do’a) itu dan tidurlah  
 dia.

(HR Thabrani)

Dan dari Zaid Ibnu Tsabit ra berkata:  
 “Aku mengadu kepada Rasulullah SAW,  
 dari hal (penyakit) susah tidur yang aku  
 derita, maka baginda mengatakan:

bacalah:

اللَّهُمَّ غَارَتِ النُّجُومُ  
وَهَدَأَتِ الْعَيْنُونَ  
وَأَنْتَ حَيُّ قَيُّومٌ  
لَا تَأْخُذُكَ سِنَةٌ  
وَلَا نَوْمٌ يَا حَيُّ يَا قَيُّومُ  
أَهْدِئْ لِي لَيْلِي وَأَنْمِ عَيْنِي  
فَقَلْتُمَا فَازْهَبِ اللَّهُ  
عَزَّ وَجَلَّ مَا كُنْتَ أَجْدَهُ . . .

“Ya Allah, segala bintang telah tenggelam, dan mata telah menjadi tenang. Engkau Maha Hidup dan Maha Berdiri Sendiri Nya, tidak mengantuk dan tidak pula tertidur. Wahai Tuhan Yang Maha Hidup dan Yang Maha Berdiri Sendiri Nya, tenangkanlah malamku dan pejamkanlah mataku.” Maka aku baca do’a itu, dan Allah SWT. melenyapkan apa (penyakit) yang ada padaku.

### **Kedua:**

Sesudah mengamalkan bacaan do’a-do’a ini, eloklah pula mengamalkan perkara-perkara berikut ini:

a - jauhilah makan malam yang terlalu akhir dan memakan makanan yang berat serta keras, dan tidak mengapa meminum air hangat atau minuman yang hangat seperti crocodial atau susu.

b - lenyapkan setiap pemikiran yang akan mengganggu atau merungingkan benak atau otak anda, disaat anda merebahkan diri anda diatas tempat tidur serta pandanglah langkah hidup ini dengan pandangan yang penuh cita-cita dan harapan cerah.

c - dan bila tidur itu (memang) sudah menjadi amalan hidup kita, itu bermakna juga hendaknya kita pergi ketempat tidur sesudah memadamkan api terlebih dahulu, lepas itu kita pejamkan mata kita. Maka sesungguhnya kita akan segera tertidur, selama kita tidak memikirkan perkara-perkara yang terjadi disiang hari.

d - jauhilah obat-obat yang menyebabkan anda sukar atau tidak tidur, kerana kesan atau akibatnya lebih besar daripada manfaatnya, dan berhati-hatilah, khasnya bagi para penuntut yang sering melakukan banyak minum obat-obat semacam ini disaat-saat masa peperiksaan, sehingga tidak menjadi mangsa akibat dari obat-obat yang buruk itu.

e - apabila penyakit “susah tidur” itu telah menguasai anda dan anda dapati diri anda terpaksa mesti mendapatkan beberapa obat pelelap/penenang, maka hendaklah terlebih dahulu anda memohon petunjuk atau nasihat daripada seorang doktor yang pakar agar supaya boleh memilhkan buat anda pil atau cairan yang sesuai untuk anda bagi menghindari (penyakit) ketagihan (obat tersebut).

Selanjutnya . . . . ., marilah senan-

tiasa kita berdo'a kepada Allah SWT. Yang Maha Memberkati hamba-hamba Nya, agar menjadikan kita semua termasuk orang-orang yang memiliki jiwa atau hati yang tenang dengan senantiasa menyebut nama Nya, menghilangkan segala keraguan serta kesedihan dan tidak terlepas dari ni'mat kerdlaan, sehingga tidak mengalami "kepenatan"

dalam hidup ini, bagaikan "penatnya kuda yang berlari diatas padang pasir" .....

Oleh: Dr Gharieb Juma'at  
Majalah Rabitah Alam Islami  
No. 8, Sya'ban 1403 H.  
Alih Bahasa: Ustaz Hj. Baharuddin Mansur



“SESUNGGUHNYA BAGI TUHAN ENKAU ADA HAKNYA YANG WAJIB ENKAU TUNAIKAN DAN BAGI DIRI ENKAU ADA HAKNYA YANG MESTI ENKAU PENUHI DAN BAGI KELUARGA ENKAU ADA HAKNNYA YANG MESTI ENKAU BERIKAN. MAKA HENDAKLAH ENKAU TUNAIKAN HAK SETIAP YANG BERHAK!”

Nasehat ini disampaikan oleh sahabat SALMAN kepada sahabat Abu Darda', yang kemudian dibenarkan oleh RASULULLAH SAW. (Riwayat Bukhari).

Maka disamping kerja keras dan amal yang kuat, kesehatan diri sendiri hendaklah juga dijaga dan diperhatikan! Demikian ajaran ISLAM.



# LAPORAN KELINIK BINA

JANUARI 1984 HINGGA JULAI 1986

---

## 1. PENDAHULUAN

Pada 20 Julai, 1986 ini genaplah usianya lima tahun. Syukur kehadiran Allah kerana dengan izinnya juga dapatlah Kelinik ini berjalan memenuhi tanggungjawab tanpa sebarang masalah besar yang boleh menjejaskannya.

Sejak laporan yang dimuatkan dalam majalah Laporan Perjalanan BINA 1982 - 1984, tidak terdapat perubahan penting yang memerlukan laporan terperinci. Walaubagaimanapun, untuk makluman para ahli perwakilan ke Mesyuarat Perwakilan BINA kali ini yang mungkin belum jelas tentang projek ini, saya akan perturunkan beberapa maklumat pokok mengenai Kelinik ini.

### 1.1 Matlamat

Projek ini diwujudkan untuk mengasas institusi perubatan secara Islam di Sarawak selain daripada salah satu strategi dakwah Islamiah di pedalaman dan ditengah-tengah

masyarakat majmuk.

### 1.2 Kedar Pencapaian Matlamat

- (i) Mendirikan beberapa buah Kelinik yang serupa dengan Kelinik yang ada (Kelinik Perintis) di pusat-pusat pentadbiran bahagian-bahagian Negeri Sarawak termasuk Kelinik bergerak.
- (ii) Mengadakan program latihan untuk menyediakan tenaga-tenaga perubatan dan paramedic yang juga mempunyai pengetahuan dan penghayatan Islam yang cukup mendalam bagi keperluan dakwah.
- (iii) Setelah ujud kedua-dua perkara di atas, didirikan sekurang-kurangnya sebuah Hospital yang memberi perkhidmatan perubatan dan kesihatan am yang menyeluruh mengikut lunas-lunas

Islam.

### 1.3 Perkhidmatan Klinik yang ada (tahap perintis)

- (i) Klinik Statik di Lot 293, Section 10, Jalan Satok (di kedai kepunyaan BINA sendiri) di jalankan seperti klinik-klinik swasta yang lain dan dibuka untuk semua orang tanpa mengira kaum atau agama.
- (ii) Klinik bergerak ke limabelas buah kampung di pendalaman dalam daerah Serian, Simunjan dan Bau dan ke sebelas buah kampung di kawasan "Suburban" iaitu antara sepuluh hingga dua puluh batu dari Kuching. Perkhidmatan dan perubatan Klinik bergerak ini diberi dengan percuma dan dikendalikan oleh Pembantu Hospital atau paramedic.
- (iii) Perkhidmatan kemasyarakatan iaitu rawatan percuma kepada fakir miskin, anak-anak yatim, penghuni rumah-rumah amal di Kuching dan murid-murid tadika BINA (Pusat) dan Tadika-Tadika kelolaan BINA Kuching dan Taska BINA.

### 1.4 Kakitangan Klinik

Sekarang kakitangan klinik terdiri daripada dua orang doktor, seorang jururawat terlatih, dua orang hospital assistant, seorang juruteknik makmal, seorang kerani, dua orang penyambut merangkap dispenser, seorang pemandu dan seorang pelayan pejabat. (Sebelas orang semuanya).

### 1.5 Kenderaan Klinik

Klinik mempunyai dua buah kenderaan iaitu sebuah Isuzu Trooper untuk Klinik bergerak ke kawasan sub-urban dan Toyota Land Cruiser untuk Klinik bergerak ke kawasan pendalaman. Sebelum tahun 1985 kita mempunyai sebuah bot terpakai untuk Klinik bergerak ke kawasan persisiran tetapi dukacitanya bot itu telah rosak teruk dan Klinik bergerak ke persisiran pun terpaksa diberhentikan juga.

## 2. SAMBUTAN MASYARAKAT

Alhamdulillah, sambutan masyarakat semakin menggalak tahun demi tahun. Bilangan purata kehadiran di Klinik statik di Jalan Satok setiap hari hampir dua kali ganda daripada bilangan purata dua tahun lalu. Syarikat-syarikat swasta yang "berpanelkan" Klinik BINA bertambah daripada dua puluh lapan buah pada dua tahun dahulu kepada lebih empat puluh buah sekarang ini.

Bagi Klinik bergerak pula, sambutan masyarakat pendalaman dan

masyarakat kawasan sub-urban adalah seperti dulu sahaja, tanpa bertambah atau berkurangan.

### 3. KEWANGAN

Untuk menampung segala kegiatannya, klinik memerlukan sejumlah \$25,000/- sebulan. Oleh kerana pendapatan klinik ini bertambah iaitu kutipan dari pesakit luar dan dari syarikat-syarikat panel, ianya hanya memerlukan peruntukan dari BINA sebanyak \$10,000 sebulan sahaja untuk keperluan Klinik bergerak dan perkhidmatan kemasyarakatannya yang diberi dengan percuma. Pendapatan Klinik sendiri dapat menampung perbelanjaan. Klinik statik sendiri dapat menampung perbelanjaan Klinik statik termasuk gaji dan upahan bagi semua kakitangannya.

### 4. PERMASALAHAN

Walaupun Klinik yang ada boleh berjalan memenuhi tanggungjawabnya, namun dalam rangka projek klinik pada keseluruhannya kita pada setakat ini masih hanya ditahap klinik perintis saja. Sepatutnya dalam jangka masa lima tahun, kita sudah mempunyai sekurang-kurangnya dua buah lagi klinik serupa di tempat-tempat lain dan program latihan sudah mula berjalan. Tetapi oleh kerana beberapa sebab tertentu yang tidak dapat dielakkan, makanya projek ini belum dapat berkembang sedikitpun. Antara sebab-sebabnya ialah:

#### 4.1 Kemelesetan Ekonomi

Projek ini sepatutnya menerima biaya dari sumber yang tertentu untuk menampung segala kegiatan dan perkembangannya. Oleh kerana keadaan kemelesetan ekonomi, sumber ini tidak mampu mengeluarkan biaya yang dijanjikan.

#### 4.2 Soal Keutamaan

BINA sebagai sebuah badan dakwah mempunyai kemampuan yang terhad. Dalam keadaan yang demikian BINA haruslah memikirkan atau mengatur keutamaannya. Memang sepatutnyalah keutamaan diberi kepada program pelajaran dan pembelajaran. Soal projek klinik bolehlah ditunda hingga keadaan memerlukan dan mengizinkan.

### 5. CADANGAN

Seperti yang telah disebutkan di atas, kejудan Klinik BINA adalah sebagai salah satu strategi dakwah Islamiah. Kalau perkembangan dalam soal pengasasan Institusi Perubatan secara Islam belum dapat kita laksanakan atas sebab-sebab tersebut di atas, pemanfaatan segala kemudahan yang ada serta peningkatan prestasi dakwah melalui pengubatan dapat kita laksanakan Insya Allah. Tetapi ini memerlukan kajian serta kerjasama erat antara

pihak kelinik BINA, Bahagian Dakwah di Ibu Pejabat BINA, pegawai-pegawai Masjid atau surau di kampung-kampung tertentu dan penghulu-penghulu kampung-kampung tersebut. Wakil-wakil dari kampung-kampung yang dilawati

Kelinik bergerak bolehlah diberi kursus khas dalam soal agama dan kesihatan serta pertolongan cemas dan program pembelajaran pembangunan manusia untuk dipraktik di kampung masing-masing.

## RANGKUMAN DOA

# APABILA BERMIMPI BURUK

اللَّهُمَّ إِنِّي أَعُوذُ بِكَ مِنْ عَمَلِ الشَّيْطَانِ وَسَيِّئَاتِ الْأَخْلَامِ

ALLAHMUMMA, INNI AUZIBIKA MIN A'MALISYSAITHAAN,  
WASAYIAATIL AHLAAM.

Ertinya:

“Ya Tuhanku, aku berlindung pada Mu dari pekerjaan syaithan dan daripada mimpi- mimpi yang buruk.”

(H.R. Ibnu Sunny.)



# MIMBAR HADIS

عَنْ أَمِيرِ الْمُؤْمِنِينَ أَبِي حَفْصِ عُمَرَ بْنِ الْخَطَّابِ رَضِيَ اللَّهُ عَنْهُ قَالَ: سَمِعْتُ رَسُولَ

اللَّهِ صَلَّى اللَّهُ عَلَيْهِ وَسَلَّمَ يَقُولُ: " إِنَّمَا أَلْأَعْمَالُ بِالنِّيَّاتِ وَإِنَّمَا لِكُلِّ أَمْرٍ

مَنْوَى ، فَمَنْ كَانَتْ هِجْرَتُهُ إِلَى اللَّهِ وَرَسُولِهِ فَهَجْرَتُهُ إِلَى اللَّهِ وَرَسُولِهِ ،

وَمَنْ كَانَتْ هِجْرَتُهُ لِدُنْيَا يُصِيبُهَا أَوْ امْرَأَةٍ يَنْكِحُهَا فَهَجْرَتُهُ إِلَى مَا

هَاجَرَ إِلَيْهِ .

( رواه البخارى ومسلم ) .

Maksudnya:

“Daripada Amiril Mu’minin, Abi Hafash, ‘Umar bin Khattab (semoga Allah meredhainya), beliau berkata: Saya telah mendengar Rasulullah Saw bersabda: “Hanyasanya amal-amal itu bergantung kepada niat-niatnya; dan hanyasanya bagi setiap orang ialah apa-apa yang diniatkannya. Maka barangsiapa yang berhijrah kerana ta’at kepada Allah dan Rasul-Nya, maka hijrahnya itu ialah kepada Allah dan Rasul-Nya. Dan barangsiapa yang berhijrah kerana hendak mendapatkan keuntungan dunia, ia akan memperolehnya; atau sesiapa yang berhijrah kerana seseorang perempuan yang hendak dikahwininya, maka hijrahnya itu adalah untuk mencapai apa yang dimaksudkannya.” (Hadis sahih, riwayat Bukhari dan Muslim)

## Uraian Ringkas

Setiap amal atau pekerjaan yang dilakukan oleh seseorang tentulah dengan sesuatu niat ataupun maksud tertentu.

Misalnya:

- a) Ada orang yang memasuki suatu Pertubuhan atau Perkumpulan, kerana hendak mendapatkan banyak kenalan untuk dapat bergembira-gembira, melepaskan lelah.
- b) Ada pula yang memasuki Per-

kumpulan atau Pertubuhan itu, kerana hendak mencapai kedudukan dan pangkat.

- c) Yang lain pula mau memasuki Pertubuhan, kerana hendak mencari kekayaan.
- d) Tapi ada pula yang memasuki Pertubuhan itu, kerana hendak memperjuangkan satu cita-cita yang murni.

Pertubuhan BINA, umpamanya, adalah satu Harakah Islamiah yang berjuang untuk menegakkan Agama Islam yang suci, sebagaimana diperintahkan oleh Allah dan yang telah dicontohkan oleh Rasul-Nya. Asas, tujuan dan cara kerjanya telah digubalkan dalam Perlembagaan dan Tafsiran Asasnya. Semboyan daripada asas kerjanya ialah:

“Ibadahku, hidup dan matiku, kerana Allah’ (maksud Al-Quran, Surah Al An'am, ayat 162)

Maka sekarang, kita alamatkan kandungan hadis tersebut diatas khasnya kepada ahli-ahli daripada Pertubuhan BINA.

Apa niat anda memasuki Pertubuhan BINA?

Sila periksa diri masing-masing!

Anda sendiri akan menentukan jawabnya.

Kalau belum sesuai dengan asas dan tujuan BINA sebagai satu Harakah Islamiah, sila perbetulkan semula!

Kenyataan akan membuktikannya!

(HASAB)

إِنَّ اللَّهَ لَا يَغَيِّرُ مَا بَقِيَ حَتَّىٰ يَغْيِرُوا  
مَا بِأَنْفُسِهِمْ (الرعد: ١٨)

Yang bermaksud:

“SESUNGGUHNYA ALLAH TIDAK MERUBAH KEADAAN SESUATU KAUM, SEHINGGA MEREKA MERUBAH KEADAAN YANG ADA PADA DIRI MEREKA SENDIRI.”

Kalau begitu,

Do'a-do'a saja ataupun sumbangan lahiriah sahaja, TIDAK CUKUP Untuk mencapai tujuan. NIAT YANG IKHLAS KERANA ALLAH dan SIKAP MENTAL YANG BERSIH DAN JUJUR SANGAT DIPERLUKAN!!!!

# NABI IBRAHIM ALAIHISSALAM

---

IBRAHIM 'ALAIHISSALAM adalah salah seorang Nabi yang dikumpulkan kedalam 'ULUL'AZMI. Kira-kira dari segi mertabat kedudukannya disisi Allah dialah berada ditemprat yang kedua selepas Junjungan kita Muhammad Sallallahu'alahi Wassalam. Berikutnya Musa kemudian Isa kemudian Nooh kemudian baki segala Rasul-Rasul dan Nabi-Nabi.

NABI IBRAHIM adalah putera Azar bin Tahur bin Seruji bin Raa'a bin Faliq bin 'Abir bin Soleh bin Arfakhshar bin Saam bin Nooh. NABI IBRAHIM dilahirkan disuatu tempat dincamkan "Firdam 'Arim" dibawah pemerintahan kerajaan Babilion. Kerajaan yang diperintah oleh seorang Raja yang mempunyai kemewahan yang tak terkira dan kegagahan yang sukar ditandingi. Raja tersebut bernama NAMRUD BIN KAN'AN. Negeranya makmur dan rakyatnya hidup walaupun senang dengan harta, tetapi bertuhan kan berhala.

Bapa Ibrahim, Azar adalah seorang penungkar dan pengukir seni. Kepandaiannya menjadikan beliau terkenal dengan mengukir patong-patong berhala. Boleh dikatakan keluarganya hidup dari titik peluh ukirannya dimana beberapa

orang adik Nabi Ibrahim termasuk Nabi Ibrahim sendiri disuruh oleh bapanya menjual patong-patong itu dipasar-pasar. Nabi Ibrahim sendiri, semenjak dari kecilnya, menolak suruhan menjual patong-patong itu dan pernah menyebut apa gunanya batu-batu yang diukir ini disembah dan dipohonkan pertolongan daripadanya pada hal ianya diukir oleh orang tuaku.

Keadaan masyarakat dinegara Babilion dari semasa ke semasa bertambah jauh dari mengenal Tuhan Yang Maha Esa. Segala ajarannya yang lurus yang ditinggalkan oleh Nabi Saleh dan Nooh dan lain-lain ribuan tahun yang lalu sudah luput sama sekali. Apa juga kesenangan dan kesusahan yang mereka terima semuanya adalah dari Namrud dan patong-patong berhala yang mereka sembah. Mereka menyembah dan mengadu tidak lain ialah kepada patong yang mereka tempahkan itu.

Oleh masyarakat Babilion yang dibawah pemerintahan Namrud, nama Allah yang mereka dengar itu tidak membawa satu pengertian apa-apapun kepada mereka. Tuhan Allah, kata mereka tidak dapat menolong sesuatu. Mereka menolak sama sekali tentang

adanya hari akhirat, dimana manusia akan dibangkitkan kelak.

Dalam keadaan dunia yang penuh dengan maksiat, khurafat dan kekejaman itu Nabi Ibrahim telah diilhamkan kepadanya sinar-sinar ketuhanan Allah dan kekuasaanNya. Beliau mendapat hidayah dari ALLAH lalu bermunajat kepada Allah meminta supaya diteguhkan kepercayaannya dan diberi peluang kepadanya untuk melihat dengan mata kepalanya bagaimanakah Allah menghidupkan semula mereka yang sudah mati. Tersebut kisah permohonannya didalam Kitab Suci Al Quranulkarim surah Al Baqarah ayat 260:

وَإِذْ قَالَ إِبْرَاهِيمُ:

رَبِّ ارْنِي كَيْفَ تُحْيِي الْمَوْتَى

• قَالَ : أُولَمْ تُؤْمِنُ ؟

قَالَ : بَلَىٰ وَلَٰكِن لِّيَطْمَئِنَّ قَلْبِي

• فَخَذَ أَرْبَعَةً مِنَ الطَّيْرِ

فَمَرَّهِنَّ عَلَيْكَ ، ثُمَّ أَجْعَلُ

عَلَىٰ كُلِّ جَبَلٍ مِّنْهُنَّ جُزْأً

• ثُمَّ أَدْعُهُنَّ بِأَتِينِكَ سَعِيًّا

• وَاعْلَمْ أَنَّ اللَّهَ عَزِيزٌ حَكِيمٌ

• (البقرة: ٢٦٠)

Maksudnya:

"Dan (ingatlah) ketika Nabi Ibrahim (merayu dengan) berkata: "Wahai Tuhanku! Perlihatkan kepadaku bagaimana Engkau menghidupkan makhluk-makhluk yang mati." Allah ber-

firman "Adakah engkau belum percaya kepada kekuasaanKu?" Nabi Ibrahim menjawab, "Bahkan (aku percaya dan yakin); akan tetapi (aku memohon ialah) supaya tenteram hatiku (yang sangat ingin menyaksikannya)." Allah berfirman: "(jika demikian) maka ambillah empat ekor burung, kemudian kumpulkanlah olehmu (dan cincanglah semuanya). Setelah itu letakkanlah sebahagian daripadanya ditiap-tiap sebuah bukit. Kemudian serulah burung-burung itu nescaya semuanya akan datang dengan segera. (Ya'ani burung-burung yang telah dicincang itu hidup semula). Dan ketahuilah, sesungguhnya Allah Maha Kuasa lagi Maha Bijaksana."

(Q-S: 2;A:260)

Adat kebiasaan masyarakat Babilion setiap kali bertukar musim, keluarlah mereka dari kota menuju ketempat-tempat perkelahan ditengah Padang Pasir.

Diwaktu itu pergaulan tidak terbatas lagi.

Rumah-rumah kediaman mereka, tempat-tempat Kuil ditinggalkan dengan tiada siapa yang mengawalinya.

Nabi Ibrahim yang berusia remaja dijempit bersama-sama mengambil bahagian bertemasya ditempat-tempat tersebut, tetapi dengan hidayah yang sedia diterima olehnya, Nabi Ibrahim mengundur diri dari ikut serta; tinggallah beliau berseorangan dirumahnya. Kesempatan ini diguna oleh Nabi Ibrahim lalu ia keluar seorang diri, terus menuju ketempat Kuil dengan sebilah kapak ditangannya. Nabi Ibrahim memohon keizinan ALLAH lalu menghancurkan segala patong-patong kecil dan sederhana yang diletakkan disekeliling patong besar didalam Kuil tersebut. Nabi Ibrahim segera mening-

galkan Kuil itu, tetapi sebelum ia melangkah keluar, kapak yang dibawanya itu digantungkannya dileher patong berhala yang besar tadi. Selang tidak berapa waktu, maka pulanglah penduduk kota Babilion dari temasya. Mereka sangat terkejut mendapati bahawa patong-patong berhala yang mereka sembah itu telah hancur, rosak binasa sama sekali. Mereka bertanya siapakah yang melakukan perbuatan yang demikian terhadap tuhan-tuhan mereka. Sesungguhnya adalah ia dari orang yang Zalim. Setengah dari mereka berkata: "Kami ada mendengar seorang anak muda bernama Ibrahim mencacinya." Berbagai telahan telah disuarakan dan akhirnya tuduhan telah dikenakan ke atas Nabi Ibrahim. Tuduhan keatas dirinya dibawa kemuka pengadilan. Para Hakim bertanya kepada Nabi Ibrahim, dihadapan khalayak ramai yang datang menyambut beliau dengan ejekan dan penghinaan. Bertanya seorang Hakim, "Wahai Ibrahim! Apakah engkau yang telah melakukan penghancuran dan kerosakan keatas Tuhan-Tuhan kami?" Dengan senyum dan tenang Nabi Ibrahim menjawab, "Patong besar yang berkalong kapak dilehernya itulah yang melakukannya". Cuba tanya saja kepadanya, siapakah yang melakukan kerosakan itu."

Para Hakim yang bertanya terdiam sejenak seraya melihat diantara satu sama lain serta berbisik-bisik seakan-akan berunding apa-apa yang akan harus mereka jawabkan atas kata-kata Nabi Ibrahim tadi. Kemudian seorang daripada mereka berkata, "Engkau tahu bahawa patong itu tidak boleh bercakap dan berkata sesuatu, mengapa engkau minta

kami bertanya kepadanya?"

Mendengar perkataan itu, maka tersenyumlah Nabi Ibrahim seolah-olah membuka peluang baginya lalu disambut cabaran itu dengan katanya; "Bukankah aku telah berkali-kali mengatakan Tuhan-Tuhan yang kamu semua sembah itu tidak ada faedahnya. Perbuatan kamu itu adalah ajaran Iblis dan Syaitan belaka. Kamu tahu Tuhan-Tuhan itu tidak boleh memberi sebarang pertolongan kepada kamu. Tuhan-Tuhan kamu itu adalah dari buatan manusia belaka. Sebagai sifat Tuhan, ia mestilah berkuasa pada segala-galanya. Tuhan aku ialah Yang Menghidup dan Mematikan. Dialah yang akan menghidupkan kamu diakhirat nanti selepas ia mematikan kamu didunia ini. "Dialah yang memberi rezeki kepada kamu. Dialah yang berkuasa pada segala-galanya. Apakah untungnya kamu mengikuti jejak langkah Syaitan. Kamu tidak akan terlepas daripada azab Tuhanku diakhirat nanti melainkan kamu beriman kepadaNya didunia ini. Bahawa aku ini tidaklah termasuk dalam golongan kamu orang Musyrikin (menyengutkan Allah)."

Hakim tadi telah kehilangan panduannya, langsung ia menuduh Nabi Ibrahim sebagai perosak ugama nenek moyang mereka. Hukuman yang dijatuhkan keatas Nabi Ibrahim ialah dibakar didalam api sampai mati.

Nabi Ibrahim menerima hukuman itu dengan senang hati. Pemerintah mereka mengeluarkan arahan supaya rakyat jelata membawa kayu untuk dijadikan unggun pembakar Nabi Ibrahim.

Maka tibalah hari pelaksanaan hukum. Nabi Ibrahim diikat kaki dan tangannya dan dimasukkan ketengah-tengah timbunan kayu yang bernyala

apinya dengan kuat dan menggilanya, tiba-tiba datanglah perintah Allah menerusi utusanNya membisik ketelinga Nabi Ibrahim supaya jangan cemas dan terus diperintahkan api tadi supaya sejok, maka selamatlah Nabi Ibrahim daripada mati terbakar.

Ke sekian lama api menjalankan tugasnya iaitu menyala dan segala kayu-kayu yang dikumpulkan tadi habis dimakan olehnya sehingga menjadi abu belaka. Tiba-tiba dicelah-celah abu itu keluarlah Nabi Ibrahim berjalan tanpa

terjejas sedikit pun samaada pakaian yang dipakainya atau tubuh badannya, melainkan tali yang diikat ke kedua belah kakitangannya sahaja yang dijilat api. Melihat keadaan itu, semua rakyat Namrud merasa hairan tercengang, masing-masing terkaku tidak dapat berkata apa-apa. Walau macamanapun hanya sebahagian sahaja dari mereka itu mahu turut mengakui bahawa Nabi Ibrahim orang yang benar.


SEKIAN

إِنَّ الْمَلَائِكَةَ لَا تَدْخُلُ بُيُوتًا فِيهَا تَأْتِيلٌ (متفق عليه)

Artinya:

“Sesungguhnya Malaikat tidak akan masuk kedalam suatu rumah yang didalamnya ada patung.”

(H.R. Bukhari dan Muslim)



# KISAH IMAN DAN CABARANNYA DALAM ALQUR'AN

Oleh: Ustaz Hj. Baharuddin Mansur

بِسْمِ اللّٰهِ الرَّحْمٰنِ الرَّحِیْمِ

- ۱- وَالسَّمَاءِ ذَاتِ الْبُرُوجِ
- ۲- وَالْيَوْمِ الْمَوْعُودِ
- ۳- وَشَاهِدٍ وَمَشْهُودٍ
- ۴- قَتْلِ أَصْحَابِ الْأَخْضُدِ
- ۵- النَّارِ ذَاتِ الْوُجُودِ
- ۶- إِذْ هُمْ عَلَيْهَا قُعُودٌ
- ۷- وَهُمْ عَلَىٰ مَا يَفْعَلُونَ
- بِالْمُؤْمِنِينَ شُهَدَاءُ
- ۸- وَمَا نَعْمُوا مِنْهُمْ إِلَّا أُنْزِلُوا بِهِ
- بِسْمِ اللّٰهِ الرَّحْمٰنِ الرَّحِیْمِ
- (سورة البروج )

Yang bermaksud:

- 1 - Demi langit yang mempunyai gugusan bintang
- 2 - dan hari yang dijanjikan

3 - dan yang menyaksikan dan yang disaksikan.

4 - Telah dibinasakan orang-orang yang membuat parit

5 - yang berapi (dinyalakan dengan) kayu bakar

6 - ketika mereka duduk disekitarnya

7 - sedang mereka menyaksikan apa yang mereka perbuat terhadap orang-orang yang beriman.

8 - Dan mereka tidak menyiksa orang-orang mukmin itu, melainkan kerana orang-orang mukmin itu beriman kepada Allah Yang Maha Perkasa lagi Maha Terpuji.

a- Tahukah anda kisah "Ashhaabul Uhdud" - "Orang-orang yang membuat parit." iaitu kisah sekelompok orang-orang mukmin,

yang telah beriman kepada Allah Yang Maha Esa, sebelum datangnya Islam.

Kerana mereka beriman kepada Allah SWT, maka orang-orang kafir dan kaum thaghut murka kepada mereka. Orang-orang mukmin dipaksa untuk meninggalkan agama mereka, tetapi mereka tetap teguh dengan pendirian dan keyakinan yang mereka miliki, iaitu ber"tauhid" kepada Allah SWT Yang Maha Esa, Tiada Sekutu bagi Nya. Dan akibatnya, kaum kafir dan thaghut itu membelah bumi bagi orang-orang mukmin, selanjutnya menyalakan api didalamnya.

Mereka lakukan demikian itu, agar orang-orang mukmin menjadi bingung (dengan siksaan yang mereka lakukan itu) diantara meninggalkan aqidah mereka atau mati terbakar api. Dan ternyata: mereka tetap beriman dengan berpegang teguh kepada agama Allah.

Maka bertambah geram lah kaum yang jahat itu, kemudian dicampakkan oleh mereka orang-orang mukmin yang membangkang ajakan mereka itu kedalam api yang mereka buat, disaksikan oleh sekelompok manusia yang sengaja mereka kumpulkan, agar menyaksikan pergulatan hidup-mati orang-orang mukmin itu.

b- Dipermulaan da'wah Islam, Nabi kita Muhammad s.a.w. dan para pengikutnya mengalami siksaan dan azab dari kaum musyrikin di Mekah. Sebahagian sahabat me-

rasakan berbagai cabaran dari orang-orang kafir yang zalim itu. Namun demikian, mereka tidaklah murtad atau keluar dari agama Islam.

c- Surah ini diturunkan bagi memantapkan pendirian dan keyakinan orang-orang mukmin, dan memberikan kesabaran kepada mereka terhadap segala apa yang dirasakan berupa azab siksaan dari kaum musyrikin. Disamping pula menyampaikan khabar berita kepada mereka, bagaimana kemantapan dan ketetapan pendirian serta keyakinan atau aqidah orang-orang mukmin terdahulu, serta kesabaran yang mereka miliki menghadapi segala bentuk kezaliman dalam melaksanakan jihad Fie Sabilillah, agar dicontohi dan ditauladani.

Surah ini dimulai dengan huruf "Qasam" - (Sumpah):

وَالسَّمَاوَاتِ الْبُرُوجِ

Yang bermaksud: "Demi langit yang mempunyai gugusan bintang."

Allah SWT bersumpah dengan langit dan gugusan Bintangnya iaitu bintang yang besar, dan

وَالْيَوْمِ الْمَوْعُودِ

- hari kiamat, dan

وَشَاهِدٍ وَمَشْهُودٍ  
الشَّاهِدِ

yakni:

yang hadir menyaksikan pada hari itu (dari makhluk-makhluk),

## والشهود

keajaiban-keajaiban yang ada pada saat itu/hari kiamat.

Kemudian sesudah itu diterangkan peristiwa apa yang terjadi atau yang dialami kaum "ukhdud" - pembuat parit.

"Ukhdud" - iaitu belahan yang melubangi bumi dalam bentuk memanjang. Allah SWT berfirman:

﴿ قَتَلْنَا أَصْحَابَ الْأَعْدُوِّ ﴾

Yakni: Allah SWT melaknat kaum "Ukhdud" - pembuat parit itu; melaknat dengan sekeras-kerasnya. Ia merupakan kalimah yang menunjukkan betapa kemarahan Allah SWT terhadap kaum "thaghut" yang zalim itu disebabkan perbuatan mereka yang buruk dengan cara membakar orang-orang mukmin.

﴿ النَّارِزَاتِ الْوَقُودِ ﴾

kaum thaghut itu dijilat api, yakni menjadi api yang menyala-nyala.

Dan firman Allah:

ذَاتِ الْوَقُودِ

mensifati api itu, kerana keras dan besarnya laknat Allah SWT terhadap kaum ukhdud itu .... mereka mustahak menerima azab Allah, sebab mereka telah melakukan sendiri jinayah itu.

﴿ اذْهَبْ عَلَيْهِمْ قُعُودٌ وَهُمْ عَلَى مَا يَفْعَلُونَ بِالْمُؤْمِنِينَ شُهُودٌ ﴾

mereka (kaum ukhdud) menyiksa orang-orang mukmin sambil duduk-duduk dipinggir parit yang berapi menyala-nyala, dimana mereka lemparkan orang-orang mukmin itu kedalamnya; kemudian mereka pertontonkan azab-siksaan yang dilakukan itu dihadapan orang-orang ramai, sehingga sampai kehancurannya, padahal orang-orang mukmin itu tidak berdosa terhadap mereka.

﴿ وَمَا نَقَمُوا مِنْهُمْ إِلَّا أَنْ يُؤْمِنُوا بِاللَّهِ الْعَزِيزِ الْحَمِيدِ ﴾

- mereka (orang-orang mukmin) itu tidak pernah mengganggu dan menyusahkan orang-orang kafir dan kaum thaghut itu, mereka hanya beriman kepada Allah ..... Mereka menjadi mangsa penganiayaan dari orang-orang kafir hanyalah disebabkan semata-mata mereka beriman kepada Allah Yang Maha Perkasa Lagi Terpuji. Demikianlah ujian terhadap keimanan yang tulin, yang jika perlu - dibayar dengan maut!



# ANTARA TUAN MUFTI DAN PENGUASA

---

Alih bahasa: Ustaz Hj. Baharuddin Mansur

---

Mufti Basrah (Baghdad) mendengar suara ketukan dipintu rumahnya. Maka beliau berkata kepada anak perempuannya: "Tengoklah anakku, siapakah gerangan yang mengetuk pintu itu." Dan bersegeralah anak perempuan itu pergi kearah pintu darimana suara itu datang. Kemudian ia kembali dan menyampaikan

kepada ayahandanya, bahwa yang datang adalah utusan "amier" atau "penguasa" Basrah. "Suruhlah dia masuk", ucap Tuan Mufti. Dan masuklah utusan tersebut dengan mengucapkan salam, dan menyampaikan sepucuk surat dari "penguasa" Basrah untuk Tuan Mufti. Salah seorang dari yang hadir di Majlis Mufti membacakan surat tersebut. Dan Tuan Muftipun tahulah bahwa Amir atau Penguasa Basrah meminta beliau datang ke Istana baginda, untuk memberikan "fatwa" terhadap sesuatu perkara.

Tuan Mufti Basrah ini adalah seorang warak lagi shaleh, tiada sesiapaupun yang ditakuti melainkan Allah SWT sahaja.

Maka berkenaan dengan permohonan Penguasa Basrah itu, beliau menulis surat balasan yang isinya menyatakan, bahwa "bila memang Baginda Amir menghajatkan sesuatu daripada beliau, eloklah kiranya bila Baginda sendiri yang datang kerumah beliau, bukan beliau yang datang ke Istana, dan mintalah nanti apa-apa yang Baginda hajatkan itu dari beliau. Kemudian, janganlah sekali-kali menunggang kuda dan membawa pengawal Istana."

Pada suatu saat, terdengarlah suara ketukan dipintu rumah Tuan Mufti itu. Dan sebagaimana biasanya, anak perempuan beliau yang kecil pergi menengoknya. Ternyata kali yang datang adalah Baginda Amir Basrah sendiri, selanjutnya masuk dan memberi salam kepada Tuan Mufti serta dipersilakan untuk duduk didepan beliau. Lalu Bagindapun berkata kepada Tuan Mufti: "Setiap kali nampak Tuan Mufti, selalu sahaja timbul rasa khawatir dan takut." "Apa sebabnya demikian itu?"

Tuan Muftipun menjawab: "Rasulullah SAW telah bersabda, bahwa

sesungguhnya orang yang 'alim itu apabila dengan ilmunya itu ianya mengharapkan keridaan Allah, maka segala sesuatu akan takut kepadanya; tetapi bilamana dengan ilmunya itu, ianya mengharapkan harta-kekayaan (yang tersimpan), ianya akan takut kepada segala sesuatu itu.

Baginda Amir selanjutnya bertanya kepada Tuan Mufti: "Bagaimana pandangan Tuan Mufti terhadap perkara ini: ada seorang hamba Allah yang mempunyai dua anak laki-laki, ianya suka kepada yang satu lebih banyak daripada kepada yang satunya lagi, dan ianya ingin memberikan 2/3 dari harta

kekayaannya kepada anak yang dia sukai itu didalam hidupnya ini." Maka Tuan Muftipun menjawab: "Rasulullah SAW bersabda, bahwa: Bilamana Allah SWT hendak mengazab seseorang kaya kerana kekayaannya itu, maka orang itu akan memberikan wasiat disaat tiba mautnya dengan satu wasiat yang zalim."

Tuan Mufti yang dimaksud adalah: Hammad Bin Salamah, dan yang dimaksud dengan Tuan Baginda Penguasa Basrah itu yakni Muhammad Bin Sulaiman, yang menguasai Ijarah Basrah pada masa Bani Abbas.

(RAI, No. 992, Safar 17, 1407 H)

إِذَا أَرَادَ اللَّهُ بِالْأَمِيرِ خَيْرًا جَعَلَ لَهُ وَزِيرًا صَدَقَ، وَإِنْ نَسِيَ ذِكْرَهُ وَإِنْ ذَكَرَ أَعَانَهُ وَإِذَا أَرَادَ غَيْرَ ذَلِكَ جَعَلَ لَهُ وَزِيرًا سَوًّا، إِنْ نَسِيَ لَمْ يَذْكُرْهُ، وَإِنْ ذَكَرَ لَمْ يَمْنَعْهُ.  
(رواه أبو داود علي شرط مسلم)

Artinya:

"Jika Allah menghendaki kebaikan terhadap seorang Raja, maka diberinya seorang Menteri (penasihat) yang jujur, jika ia lupa diingatkannya dan jika ia ingat, dibantunya. Dan jika Allah menghendaki sebaliknya dari itu, maka Allah memberi padanya Menteri yang jahat, hingga jika ia lupa Menteri itu tidak mengingatkan, dan jika ia ingat, tidak dibantunya.

(H.R. Abu Daud atas Syarat Muslim)



*Sudut Profail*

# SEORANG INTELEK DAN AKTIBIS

ARABIA The Islamic World Review

Terjemahan: Letifah Fathi

- 1) Dr. Yusuf al-Qardawi bukan sahaja seorang ulamak yang intelektual yang menghabiskan masa dengan buku dan manuskrip sahaja tetapi juga seorang aktivis yang banyak mengembara, memberi ceramah tentang Islam, dan perihal mustahaknya kaum Muslimin memikul tanggungjawab sosial dan kerja-kerja pengislaman. Beliau telah menulis beberapa buah buku, antara lain buku mengenai Halal dan Haram. Beliau juga adalah pengasas Yayasan Kebajikan Islam Antarabangsa (International Islamic Charitable Foundation) yang berpusat di Kuwait. Bagi beliau, hidup ialah berdakwah. Bahawa kehidupan itu adalah suatu pemberian, yang luhur dan murni yang seharusnya digunakan kejalan Allah, adalah satu pengajaran pertama yang diterimanya semenjak kecil dari bapa saudara yang telah menjaga beliau sesudah ayahnya meninggal. Ini berlaku ketika beliau berusia dua tahun, dan pada usianya empat belas tahun, ibunya pula meninggal dunia.
- 2) Dr. al-Qardawi, yang berusia 60 tahun, kini adalah seorang intelek/ulamak Islam yang masyhur di dunia. Beliau dilahirkan di Suft, sebuah perkampungan kecil di bahagian barat Mesir. Meskipun ayahnya seorang petani, tetapi bapa saudaranya tetap memastikan agar beliau menerima pelajaran agama yang sebaik-baiknya.
- 3) Beliau hafaz Al-Quran dalam usia yang sebegitu muda, yakni 10 tahun. Tamat persekolahan, beliau memasuki Universiti al-Azhar dan lulus dalam tahun 1952, dengan pengkhususan dalam bidang Usuluddin. Beliau merupakan pelajar pertama menerima ijazah diantara 500 graduan yang mendaftar masuk pada tahun yang sama dengannya. Pada tahun 1954, beliau memperoleh diploma dari

- Kolej Pengajian Arab, Universiti al-Azhar. Pada tahun 1960 beliau lulus Ijazah Sarjana dalam bidang Quran dan Sunnah, manakala pada tahun 1973 pula, beliau menamatkan ijazah lanjutan dalam bidang zakat dan peranannya dalam masyarakat Islam.
- 4) Dr. Qardawi memang seorang yang aktif dalam pergerakan Islam semenjak di bangku sekolah lagi. Beliau adalah ahli Pertubuhan Ikhwan al Muslimin, dan sewaktu pemerintahan Nasser beliau sering dipenjarakan kerana ketegasan pendiriannya. Pada satu ketika beliau pernah dijatuhkan hukuman penjara selama 10 tahun, tetapi dibebaskan 20 bulan kemudian. Pertama kali beliau menjalani hukuman penjara ialah sewaktu berusia 19 tahun. Kesalahan yang dilakukannya ialah menghadiri perjumpaan yang diadakan oleh pemimpin-pemimpin Ikhwan al Muslimin.
  - 5) Selepas menerima Ijazah Sarjana, Dr. Qardawi pergi ke Qatar untuk mengendali sebuah institusi Agama. Malangnya ketika kembali ke Mesir kerana urusan keluarga dalam tahun 1962, beliau sekali lagi dipenjarakan. Setelah dibebaskan, beliau kembali ke Qatar untuk memulakan hidup sebagai orang buangan, tetapi kembali semula ke Mesir dalam tahun 1972 sewaktu pemerintahan Sadat untuk menyerahkan tesis kedoktorannya.
  - 6) Dalam tahun 1973 beliau kembali semula ke Qatar untuk menjawat jawatan Dekan Fakulti Syariah di sebuah Universiti yang baru ditubuhkan, iaitu Universiti Qatar. Jawatan ini masih dipegangnya hingga sekarang.
  - 7) Dalam arus kesibukannya, Dr. Qardawi tetap terus menjalankan ka-jiselidik, dan telah menerbitkan kira-kira 20 buah buku berkenaan aspek-aspek Islam dan dunia Islam.
  - 8) "Halal dan Haram" adalah hasil tulisannya yang paling masyhur, dan telah di alihbahasakan ke bahasa Turki, Urdu, Indonesia dan Inggeris (sekarang sudah ada dalam bahasa Malaysia). Buku tersebut telah diulang-cetak sebanyak 19 kali dalam bahasa Arab, dan sehingga kini masih mendapat sambutan hangat dari para pembaca. Lain-lain buku tulisannya yang masyhur ialah Islam dan Iman, Ibadat dalam Islam, Islam dan Kemiskinan dan Wanita yang Beriman. Buku-buku ini juga telah di alihbahasakan ke beberapa bahasa asing.
  - 9) Beliau juga turut serta dalam penerbitan buku-buku teks mengenai pengajaran Islam, yang banyak digunakan oleh sebahagian besar universiti dan sekolah-sekolah. Beliau juga adalah penyumbang tetap rencana-rencana yang ditulis untuk media Arab.
  - 10) Dr. Qardawi, pada dasarnya ialah seorang pengembang agama/pendakwah dan telah menulis sebuah buku panduan khas untuk para pendakwah yang lain. Latihan awal

mengenai kerja-kerja dakwah diterimanya dari Hassan al-Banna, semasa menjadi ahli Pertubuhan Ikhwan al Muslimin. Hassan al-Banna menjadi contoh dan mendorong kuat Qardawi untuk ikut serta dalam peperangan Jihad menentang Israel.

- 11) Seperti al-Banna, Qardawi juga menghabiskan masa hidupnya mendorong serta membimbing golongan muda ke arah yang benar, dan menentang pengaruh pendakwah-pendakwah Kristian yang cuba mengkristiankan kaum Muslimin.
- 12) Dr. Qardawi sedar bahawa pergerakan Kristian telah berjaya mengumpulkan sejumlah besar wang untuk membiayai operasi dakwah mereka di dunia Islam. Untuk melawan gejala ini, beliau percaya kaum Muslimin memerlukan sebuah pertubuhan yang kuat dan teguh di bidang dakwah. Sehingga kini beliau telah mendirikan sebuah Yayasan Kebajikan Islam, yang diketuai oleh Yousuf Jassim al-Hiji, seorang bekas menteri Kuwait. Yayasan berkenaan bercadang mengumpulkan wang sebanyak \$1,000/- juta untuk pengelolaan kerja-kerja dakwah.
- 13) Dr. Qardawi juga aktif di bidang pengurusan bank tanpa-faedah.

Beliau ingin sekali untuk menolak kepercayaan bahawa tidak ada kejayaan yang dicapai tanpa wang, tidak ada wang tanpa bank, dan tidak ada bank tanpa faedah. Beliau menduduki tempat yang tinggi dalam pertubuhan yang menyelia kerja-kerja Persekutuan Bank-Bank Islam Antarabangsa, dan beliau juga adalah penasihat untuk beberapa buah institusi kewangan dan ekonomi Islam di beberapa buah negara.

- 14) Tetapi pelajaran tetap menjadi tumpuan kegiatan utamanya. Beliau adalah seorang ahli Majlis Tertinggi Pelajaran di Qatar, dan menghabiskan banyak masanya dalam hal-hal akademik. Beliau kini mengumpul bahan untuk ensiklopedia mengenai tradisi Kerasulan, dan tidak sabar untuk menyiapkan kerjanya secepat mungkin. Beliau percaya untuk menghadapi cabaran abad ke 21 kelak, kaum Muslimin haruslah bersedia mengembangkan kemampuannya di segala segi, dan beliau juga menyeru agar mereka lebih aktif dalam segala bidang. Tetapi sebelum membuat peringatan ini kepada kaum Muslimin sekalian, beliau terlebih dahulu memastikan bahawa dirinya juga mahir dalam segala bidang.

# **AMAL**

---

Dari: Bahagian Hal Ehwal Pelajar BINA

---

Firman Allah SWT: [Surah At-Tiin: ayat 4]

“Sesungguhnya kami telah menciptakan manusia dalam bentuk yang sebaik-baiknya.”

Sebagai insan yang kamil (sempurna) yang dicipta dengan sebaik-baik kejadian, kita harus sedar bahawa setiap permulaan hidup ada pengakhirannya. Setiap langkah yang kita lalui semakin hampir kita kepada pertemuan. Hampir dekat kepada liang lahad, yang merayu rindu dan dendam.

Sudahkah kita bersedia menghadapi pertemuan yang pada waktu itu tiada satupun yang dapat menyelamatkan kita.

Firman Allah SWT: Apabila telah datang ajal kamu maka tidak dapat kamu minta untuk di-pertanggunghkan mahupun dipercepatkan.

Dan ketahuilah Malaikat Izrail tiada lali dalam tugasnya.

Ingatlah wahai teman,

Dunia ini adalah laksana pentas yang kita adalah pelakunnya. Setiap lakunan itu ditentukan gaya dan persembahannya. Berlakunlah dengan sesuka hatimu. Demi merealisasikan lakunanmu kau puaskan nafsu duniamu untuknya. Tapi ketahuilah Penciptamu akan senyum dalam kemurkaan sambil menjanjikan azab untukmu sebagai tambahan gaji atas lakunanmu itu.

Tunggulah saat dan ketikanya dimana pada waktu itu tiada satu pun yang berguna melainkan AMALANmu.

Ketahuilah wahai temanku,

Temanmu semasa di dunia yang memuaskan nafsumu hanyalah harta dan perhiasanmu. Temanmu semasa kau diusung kepermukaan liang lahad hanyalah sahabat-handaimu yang jauh dan dekat meratap atas pemergianmu. Itu hanyalah teman sementaramu semasa kau berada di dunia yang fana ini, bukan teman bersama mu tatkala kau berhadapan dengan pengadilan yang Maha Adil: mahkamah Allah Azza wajalla.

Ketahuilah temanmu pada waktu itu hanyalah AMALANmu. Jika baik dan cukup amalanmu, maka SYURGA lah tempatmu dan jika buruk dan banyak atau besar amalan mungkar mu maka NERAKA lah layak bagimu (Wal i'yazubillah).

Oleh itu yakinilah akan hari ini iaitu:-

“ ..... PADA HARI YANG DIWAKTU ITU ADA MUKA YANG PUTIH BERSERI, DAN ADA PULA MUKA YANG MENJADI HITAM MURAM. ADAPUN ORANG-ORANG YANG MENJADI HITAM MURAM MUKANYA (KEPADA MEREKA DIKATAKAN): KENAPA KAMU KAFIR SESUDAH KAMU BERIMAN? KERANA ITU RASAKANLAH AZAB DISEBABKAN KEKAFIRAN MU ITU. ADAPUN ORANG-ORANG YANG MENJADI PUTIH BERSERI MUKANYA, MAKA MEREKA BERADA DALAM RAHMAT ALLAH (SYURGA): MEREKA KEKAL DI DALAMNYA. ITULAH AYAT-AYAT ALLAH, KAMI BACAKAN AYAT-AYAT ITU KEPADAMU DENGAN BENAR: DAN TIADALAH ALLAH BERHENDAK UNTUK MENGANIAYA HAMBА-HAMBANYA.”

Wallahu 'alam.


(Surah Ali'Imran: ayat 106-108)

## RENUNGAN

### Dari Saiyidina Jibrail kepada Rasul SAW:

Cintailah siapa saja yang akan kau cintai  
Tapi jangan lupa engkau akan berpisah  
Berbuatlah apa saja yang akan kau perbuat  
Tapi jangan lupa engkau akan dapat balasan  
Hiduplah sesukamu  
Tapi jangan lupa engkau akan mati.

(Kitab Ihya Ulumuddin)



# Kursus BINA Cawangan Limbang

BINA Cawangan Limbang (Bhg. ke 5) telah mengadakan senarai Kursus bersempena dengan peringatan Hari Keputeraan Nabi Besar Muhammad SAW, pada 11 hingga 14 Rabiul Awwal, 1407/13 sampai 16 November, 1986. Kursus-kursus yang diadakan ialah:

1. Kursus kesedaran Islam untuk penuntut-penuntut Sekolah Menengah.
2. Kursus kepimpinan dan harakah, khas untuk ahli-ahli BINA.

Tenaga-tenaga pensyarah dan pembimbing didatangkan dari BINA Pusat. BINA

Cawangan Limbang aktif memberi kerjasama dalam mengelolakan dan menjayakan perayaan memperingati Maulud Nabi Muhammad SAW, yang telah ditaja oleh Jawatan Kuasa peringkat Daerah Limbang.

Pada kesempatan hari yang bersejarah itu, BINA Cawangan Limbang telah pun mengadakan satu Majlis perpisahan murid-murid TABIKA yang tammat pada peringkat umur 6 tahun, bertempat di Dewan BINA Limbang. Semoga BINA Cawangan Limbang akan dapat bergerak lebih cergas lagi.

## RALAT

Kami meminta maaf kerana terdapat sedikit kesilapan dalam keluaran AL-HUDA No. 15 dan No. 16.

AL-HUDA No. 15.

Muka Surat	Salah	Betul
13	واعرض واعرض	واعرض عن المشركين (الحج: ٩٤)

AL-HUDA NO. 16

Muka Surat	Salah	Betul
Kulit muka 35	RABIUL AWAL 1407 ولا بعض	RABIUL AKHIR 1407 ومن بعض

AHAD	ISNIN	SELASA	RABU	KHAMIS	JUMAAT	SABTU
				1 <sub>1</sub>	2 <sub>2</sub>	3 <sub>3</sub>
4 <sub>4</sub>	5 <sub>5</sub>	6 <sub>6</sub>	7 <sub>7</sub>	8 <sub>8</sub>	9 <sub>9</sub>	10 <sub>10</sub>
11 <sub>11</sub>	12 <sub>12</sub>	13 <sub>13</sub>	14 <sub>14</sub>	15 <sub>15</sub>	16 <sub>16</sub>	17 <sub>17</sub>
18 <sub>18</sub>	19 <sub>19</sub>	20 <sub>20</sub>	21 <sub>21</sub>	22 <sub>22</sub>	23 <sub>23</sub>	24 <sub>24</sub>
25 <sub>25</sub>	26 <sub>26</sub>	27 <sub>27</sub>	28 <sub>28</sub>	29 <sub>29</sub>	30 <sub>30</sub>	

JADUAL WAKTU SEMBAHYANG

Tarikh	Daerah	Subuh	Terbit Matahari	Zuhur	Asar	Magrib	Isya
1-5	Kuching	5.17	6.40	12.42	4.07	6.46	7.59
	Sri Aman	5.12	6.35	12.37	4.02	6.41	7.54
	Sarikei	5.14	6.37	12.39	4.04	6.43	7.56
	Sibu	5.13	6.36	12.38	4.03	6.42	7.55
	Bintulu	5.09	6.32	12.34	3.59	6.38	7.51
	Kapit	5.07	6.30	12.32	3.57	6.36	7.49
	Miri	5.07	6.30	12.32	3.57	6.36	7.49
6-10	Limbang	5.04	6.27	12.29	3.54	6.33	7.46
	Lawas	5.03	6.26	12.28	3.53	6.32	7.45
	Kuching	5.19	6.42	12.44	4.09	6.48	8.01
	Sri Aman	5.14	6.37	12.39	4.04	6.43	7.56
	Sarikei	5.16	6.39	12.41	4.06	6.45	7.58
	Sibu	5.15	6.38	12.40	4.05	6.44	7.57
	Bintulu	5.09	6.34	12.36	4.01	6.40	7.53
11-15	Kapit	5.07	6.32	12.34	3.59	6.38	7.51
	Miri	5.07	6.32	12.34	3.59	6.38	7.51
	Limbang	5.06	6.29	12.31	3.56	6.35	7.48
	Lawas	5.05	6.28	12.30	3.55	6.34	7.47
	Kuching	5.21	6.44	12.46	4.11	6.48	8.03
	Sri Aman	5.16	6.39	12.41	4.06	6.43	7.58
	Sarikei	5.18	6.41	12.43	4.08	6.45	8.00
16-20	Sibu	5.17	6.40	12.42	4.07	6.44	7.59
	Bintulu	5.13	6.36	12.38	4.03	6.40	7.55
	Kapit	5.11	6.34	12.36	4.01	6.38	7.53
	Miri	5.11	6.34	12.36	4.01	6.38	7.53
	Limbang	5.08	6.31	12.33	3.98	6.35	7.50
	Lawas	5.07	6.30	12.32	3.97	6.34	7.49
	Kuching	5.24	6.46	12.47	4.12	6.50	8.04
21-25	Sri Aman	5.19	6.41	12.42	4.07	6.45	7.59
	Sarikei	5.21	6.43	12.44	4.09	6.47	8.01
	Sibu	5.20	6.42	12.43	4.08	6.46	8.00
	Bintulu	5.16	6.38	12.39	4.04	6.42	7.56
	Kapit	5.14	6.36	12.37	4.02	6.40	7.54
	Miri	5.14	6.36	12.37	4.02	6.40	7.54
	Limbang	5.11	6.33	12.34	3.99	6.37	7.51
26-31	Lawas	5.10	6.32	12.33	3.98	6.36	7.50
	Kuching	5.25	6.47	12.49	4.13	6.52	8.04
	Sri Aman	5.20	6.42	12.44	4.08	6.47	7.59
	Sarikei	5.22	6.44	12.46	4.10	6.49	8.01
	Sibu	5.21	6.43	12.45	4.09	6.48	8.00
	Bintulu	5.17	6.39	12.41	4.05	6.44	7.56
	Kapit	5.15	6.37	12.39	4.03	6.42	7.54
26-31	Miri	5.15	6.37	12.39	4.03	6.42	7.54
	Limbang	5.12	6.34	12.36	4.00	6.39	7.51
	Lawas	5.11	6.33	12.35	3.99	6.38	7.50
	Kuching	5.28	6.48	12.51	4.14	6.54	8.06
	Sri Aman	5.23	6.43	12.46	4.09	6.49	8.01
	Sarikei	5.25	6.45	12.48	4.11	6.51	8.03
	Sibu	5.24	6.44	12.47	4.10	6.50	8.02
26-31	Bintulu	5.20	6.40	12.43	4.06	6.46	7.58
	Kapit	5.18	6.38	12.41	4.04	6.44	7.56
	Miri	5.18	6.38	12.41	4.04	6.44	7.56
	Limbang	5.15	6.35	12.38	4.01	6.41	7.53
	Lawas	5.14	6.34	12.37	4.00	6.40	7.52

JANUARI

**TAHUN BARU MASIHI**  
 1 J/AWAL 1407  
 1 JANUARI 1987

**TAHUN BARU CINA**  
 29 J/AWAL 1407  
 29 JANUARI 1987

# Yay!

Jadikan **AL-HUDA**  
bacaan anda  
setiap masa,  
dapatkan senaskah.



**JANGAN LUPAI!**

Memberi sumbangan, berupa artikel, buah fikiran, kewangan bagi membayari penerbitan yang sekarang masih terbatas.